

四庫全書

子部

欽定四庫全書

子部
珊瑚木難卷七

詳校官中書臣孫溶

編修臣程嘉謨覆勘

總校官原任中允臣王燕緒

校對官助教臣羅萬選

謄錄副榜臣李玠

欽定四庫全書

珊瑚木難卷七

明 朱存理 編

吳文壽詩

文壽字景南臨川人有南窓吟稊草廬為序

偶出

大兒讀書鸞語清
小兒學字蚓斜行
閉門枯坐茗作伴
送客偶出花亂明
一行兩行北歸雁
三月二月東風晴
江臯農事驚春及
白水黃牛人起耕

舟泊譚溪

溪上雨晴人浣紗一痕西日水明霞出林苦筍高於竹
落岸殘潮淺及沙春事去人心自懶年光到我髮先華
三三兩兩誰家子快馬輕裘踏落花

寄涂伯賢

杜若生洲啼伯勞山城遊處憶同袍岸花送客舟千里
春雨添江水一篙遺跡驚鴻留雪爪去心飛鷁御風毛
何時挂席隨南斗酒濕紅裙夜月高

秋野

傍溪人戶兩三家
篁竹楓林小路斜
我欲為農渾未得
秋風歸夢繞黃花

疎籬殘菊益猶香
入眼西風雁數行
秋色淡濃天紺碧
亂山如畫濕烟光

寄興

春淺寒猶在
村遙得酒艱
亂雲埋老樹
飛雨暗前山
事去心徒苦
花遲興自閑
惟餘雙白鷺
相對共吾閒

十二月樂章

宮牆新春著柳梢輕絲染作鶯黃嬌風裁雨織舞折腰
梅花浩浩飛瑤瑤天官賜福下紫霄人間壽獻南山高
正月

緗簾拂香花弄姿春風暖入猩紅幃遊絲冉冉弄晴碧
胡燕伯勞江上飛蜀花移根醉清淑御輦行春碾銅軸
複道飛空聲殷雷清夜瑤池理絲竹年年春滿阿嬌家
紫絲步障金蓮花 二月

蕙風吹晴雲熱暖修禊年年曲江岸紫茸初成蒲葉短

楊花晴雪樓臺滿
我髻新粧下南苑
霓旌雉扇行簫管

香塵散作隴雲飛
人間迴首青春晚

三月

穉龍梢梢香粉淺
枝上殘春無一點
弄晴小雨密如毛
葱蒨團迴翠波軟
薰風一夜搖麥甸
黃雲斜開碧雲捲
落手金丸脆堪薦

四月

宮花拂御香
猩血濺袍黃
今日菖蒲酒
玉花浮翠觴
朱符纏臂縷
金黍浴蘭湯
寶扇弄明月
風生羅袖香

五月

火龍出海駕雲車
雲車吐燄炊赤沙
燕王黑蚌珠那得

來人家雪山在何處
冰海空作柱羅紈
夕無風肌肉暗
泣露藕花水殿待明月
坐看飛星白光沒

六月

銀濤界天河影
白河上年年候
槎客漢家秋殿鎖
鬼鬼王母鸞車去
不來粉面修眉冠
月嫵願乞巧來持拙去
芰荷花老槿花榮
夜色秋聲滿涼浦

七月

列星排空光琰琰
玉玦無聲夜西轉
促織宵啼旅雁秋
怨客枕無眠香闌念遠
風淒幽房月明深
殿愁帶似割
泪花如翦
桂簾香霧夜景差
明朝翠瓦成輕練

八月

鑄金佛面黃岑岑千百億佛見色身仙人捧觴作花壽
花香清入梅枝瘦露溥溥風颼颼螢螢光豺祭獸遙天
紉雲濕邊月白如晝凍露開花噴玉光闕城夜白征人

首九月

移短晝續長夜幽壁燈花凝寒炧錦帳懸鉤風不搖芙
蓉春暖生蘭麝我我霜雉鎔白銅玉河直貫天西東繁
霜草枯健鶻疾將軍曉獵號角弓

十月

銀雪稠稠塞八表枯樹啼號老梅笑徘徊白鳳闌空來

冰花浮夜蓮花晚仙人刻玉作楮葉撒向人間收不得
酒香熱面眺齋寒一夜羣纖籠縞白玉管吹灰露春色

十一月

梅花玉鍊容拍盞翠光濃春色來漸近歲華潛告終
亭飛綵燕裊裊綴釵蟲玉漏知宵短金爐覺暖融土牛
餞太歲回首踏春風

十二月

吳景南詩序

吳景南家臨川南鄉之種湖向來曾從空山雷講師學

詩尊敬其師既沒而拳拳不能忘講師之詩雄健景南之詩婉麗其子寵以示予惜予不能詩寵也其請於工詩之士刪其所可刪者存其所可存焉斯足以彰父之美矣八十五翁吳澄序

予幼時嘗從空山雷先生遊因知種湖吳景南亦執經先生之門未及識焉後二十年予在朝奉命代祀還山景南來山中始得少叙疇昔之所聞者元統乙亥夏五予扈大駕清暑上都其猶子實攜至南窓吟豪首卷求

序言余游方之外每聞父師之教究性命之學間作一二詩不過陶寫性理歌頌雍熙而已豈曰專門於詩者哉空山先生有道君子也景南既從之遊其所得不待告而知之矣今數其子弟輩教授鄉里者凡十餘人詩禮之傳有足徵焉尚奚以予言為雖然南窓之吟清俊藻麗自成一家子孫其珍襲之學士臨川吳公當代名筆也因特為序其端惜予未及見他日過種湖之上拜空山之墓就一讀焉於是乎書特進上卿玄教大宗師

看雲道人吳全節寓上京紫真宮西方丈

露筋廟碑

天地之間惟二氣陽況君子陰比小人而五行交相為
功各有正位其龐雜者亦交處於陰陽之間蓋亂臣賊
子之所稟婦人女子之所羞雖其粉飾一時班域聖賢
明未即察而陰譴亦不旋踵則澤國之女潛膚露筋不
就有幃之子氏不顯於一時祠方揭於千古庸夫庸婦
之所傳稱有如昨日是幽明之所共信而古今不可得

而議者然則伯夷叔齊之節不必俟聖人萬世所自知
明矣紹聖元年十月中岳外史米芾東歸過其下刻石
贊曰王化煥猗盛江漢叔運煽猗人倫亂一德彥猗昭
世典情莫轉猗天質善楚澤緬猗雲木偃煒斯罔猗日
星建

畋謬丞帥府將及二載護使客往反凡十拜祠下其
碑刻之所傳蔑有存者偶家藏元章真跡著偉節足
以律人者已不敢私謹摹刻置於郡丞官舍使後世

有考焉淳熙乙未七月既望虔亭翟旼題乙巳十月
廿二日書于玉峰景德寺僧舍

楊維禎詩

丁孝子行

孝子蘭刻木肖母顏木有神痛相關況我孝子有母上
堂問安否母胡為母雙瞽母瞽捫壁行行聽孝子聲孝
子泣母舐母目何時仰見天日星朝舐瞽暮舐瞽一日
二日百里程母瞽豁然而月明隣里來賀母如長夜再

生孝子名上達天聰華表柱為孝子旌

石新婦

亭亭獨立傍溪濱四傍無人水作鄰
苔髮不梳千古髻翠眉空掃萬年春
霜為鉛粉憑風傳霞作胭脂仗日勻
莫道岩前無寶鏡一輪明月照夫人

桃花犬

邑吳氏仲衡家畜犬病踣子能銜食哺其母死葬小
山下有花開如白鳳仙人因稱之為孝犬云

昔桃花孝義聞天家今桃花生子在吳家桃花子母病
路不起三子者累累若悲啼有一子銜食哺母母食之
子始出馳一去復一來眠母左右不一離吳老人壽期
願五葉孫斑斕衣門前荆樹不分枝柱下並蒂生靈芝
吳家孝慈及草木況爾桃花為有知喔喔梟獍兒泥塗
我宮室蕩裂我四維風俗日壞壞不支歌桃花作家慶
吳家兒當執政桃花姓姓化梟獍

右三詩見諸暨志

元真館小集

至正四年十二月十七日子從客過如林還謁元真
館盧伯融為酒食來餉會六七人醉而以山意衝寒
欲放梅分韻予得衝字七人者李孝光季和釋德莊
蒙泉郭翼羲仲瞿智惠夫陸仁良貴呂誠敬夫也

良朋謝郭邑勝賞屬玄冬野靜梅將發山乾雪未封生
萸近芳節出日媚川容愁用詩湔洗寒憑酒打衝幽人
每多暇俗子自無悰聊以供娛悅詎知縻萬鍾

李孝光

寒雲蔽朝曦野水鳴淨潺偶茲倚松樹若游天壇間芳筵接華屋寶瑟觸瑤環粲粲庭下梅寒英雜苔斑良會歡方洽轅轍勤屢攀仰視河漢高笙鶴在瑤山

呂誠

我從仙山游投策聊自憇脩篁翳春蕤陰雪留叢桂於焉賞茲趣載酤雜繁饒班坐依年齡被服製荷芰嘉會諒靡常燕樂以適意今我不云樂歲月亦云駛

盧昭

四時互推序歲事倏已閒羣陰閉萬蟄元氣若龍蟠大哉天地心微陽見其端一一根太極春葩俄星攢馨香

不盈掬微雲那忍食貞素矢弗移相與任歲寒

郭翼

旭日散遠垌行遵滄海曲幸逢文士集蘭酌忻見屬念
茲芳歲至去日如轉燭昭代無遺賢白駒在空谷六子

慕玄理省已無營欲何哉塵中人自令類蠻觸

釋德莊

窈窕玄館靜方外邀情皂珠樹雜霰下瑤芳微風蕩張
筵命宴集傾簞酌佳釀坐客仰令才歡舞迭清唱樂茲
歲時康況及年齡壯甌甌塵鞅中安得任流放

陸仁

朝遊玄真館暮宿容城臺正身秀眉翁光顰紫霞杯醉

夢廣樂作鷗絃似鳴雷玉女左右侍皎皎嘆且咍帝令
歸洗隨羽車載之迴醒來雪盈尺但見庭中梅

瞿智

漫興九首

瞿盧袁陸思清警要我題詩來鶴亭月下吹笙看舞影
竹中移柵護霜翎

廣平梅詞吐清婉惠連雪賦映嬋娟况有文章兼二美
呂家亭子得無傳

白雲滿地如白石明月窺江來近人最憶滎陽好兄弟

著霜柿葉寫詩新

淮泗大水斷禾黍間道居人巢樹頭
漢武曾聞歌瓠子
老翁更擬賦黃樓

城南市中有楚客醉卧高樓看月生
兩兒共扶不肯下
紫簫吹度到天明

側聞朝家置史館須得班馬出羣材
揭公已老歐陽死
近者何賢為總裁

北山一士禪宗秀爛漫交情只憶渠
每與王郎傳詛楚

不同懷素學狂書

永嘉為儒有陳子更思文雅得曹髯麟趾鳳毛不數見
龍文虎脊有誰兼

江上十月風日好小桃欲開春可憐絕勝龍沙三尺雪

雕弓射雁拂廬前

郭翼

題朱澤民畫

白雲白如太古白青山青似佛頭青何時約客山頭寺

春日題詩錦繡屏

楊庶夫

山水之圖不盈尺染得水碧與空青明朝為借王喬舄

飛入匡廬九疊屏

張伯雨

遊山曾識仙人氣每見雲來眼為青夢著峨眉好秋色

小奴秉燭看銀屏

李孝光

送瞿惠夫青龍學官二絕

山雨蕭蕭夜轉多思君別後定如何惟犀怪底時時動

池上東風生綠波

雲影垂江漑樹陰題詩東閣曉寒侵便須騎馬迎君去

街上青泥三尺深

呂敬夫

送進士蕭孟南之官建始序

長沙蕭竹園先生之子潭字孟南為蘇州府儒學弟子
讀春秋經登庚辰科進士第廷試在一百九名之中除
署知夔州府建始縣事歸辭其親將即任走江潯為別
且乞言予托交竹園有年矣言可靳乎予曰吁儒者之
效不著久矣何也三代之時道行於上化浹於下豈非
儒者之效也周之衰君臣父子之道幾乎熄孔子慮之

深筆之六籍為萬世準由古迄今建學立師以掌之不可一日廢者誠以國家倚為培育英材之地他日用之則君心之邪正國體之強弱民俗之安危政治之要靡不繫焉故也惜乎歷代之君往往未能皆知所以興學設教之意而開導其君故自漢以來君臣治迹或替或隆由儒者之效不大白於世而斯民不獲蒙其澤者多矣孟南學校士也其亦有感乎然猶有說為孟南告者夫學校之士必由科舉而進科舉豈古人設此為干祿

計哉蓋將以此觀士之素蘊耳先儒嘗曰使孔子生今
之日亦必由科舉出科舉豈能累孔子耶然則孔子不
為科舉累者善其學即筆之六籍掌之學官由身心而
推之家國天下之學也奈何後世之士徇功名之心忘
義利之辨其所學與聖人背馳始而燈火寒窗孜孜矻
矻以求得及其既得而遂怠之假聖言為求仕之筌蹄
學者以相為效而不疑有司以為故常而不慮視致君
澤民之術為紙上語其於古者設科取士之意果安在

哉嗚呼此士風之所以不厚而儒者之效所以不著有
自來矣孟南學校士也寧不因予言而自振乎矧孟南
童時嘗從鄉先生俞立菴游而乃翁竹園有學有守父
師之訓必聞之熟矣今之往也思作養之不易宜以古
之循良自期庶謹以持身和易以接物盡瘁竭誠恪恭
厥職使居民過客感戴稱頌皆曰由進士來者其效乃
若此異時非特輝映朝廷亦將延譽於父母師友矣予
剖目以俟建文二年秋七月廿有三日范陽盧充賴序

字次農

陳維寅墳志銘

處士諱汝秩字惟寅姓陳氏其先本蜀人遠祖篆嘗登
宋宣和進士第歷官至左朝散大夫曾大父洽宋鄉貢
進士大父仝父徵皆有隱德父嘗從草廬吳先生學既
卒業乃北上燕趙遍交當時名公鉅卿論天下事已而
南還遂於吳卜居焉母江氏宋丞相萬里之孫女也處
士生而警敏剛介才氣過人早失怙能力貧以篤學工

於詩文有古作者之風且嗜古凡前代名畫法書與今人之作心誠好之雖傾貲購得弗惜也與人論古今人物賢否治道興衰自夜至於曙弗怠也奉母夫人曲盡歡心與人交懇懇而有情當大明維新以人材聘至京將大用辭以母老得歸田里正圖菽水以盡親餘年竟以疾卒豈不哀哉處士生於天曆己巳十一月初四日卒於洪武乙丑四月一日享年五十有七娶袁氏生男一人純女四人咸未娶嫁卜以是月六日丁酉葬吳縣

雅宜山大墩之原從先人兆次友人張適叙而銘之銘
曰嗚呼惟寅豐其才而莫伸工其辭而益貧竟潛晦以
終身者將以發乎後昆也耶

鄧善之詩

清明日會宋集賢園亭時梨花盛開飲酒聽歌
樂甚張郭二學士命僕賦詩

琪樹吹香蕩夕暉華簪人對雪霏霏漢宮新火初傳燭
楚女行雲乍濕衣一片花疑蝴蝶化滿枝春想玉奴飛

蛾眉不用梨園曲唱徹瑤臺醉未歸

客京師次張仲實見寄觀梅韻

花老蠻烟細雨塵幾經清夢嘆真真夜窺幽樹唯山鬼
暖入孤根有谷神歲晚粧殘金屋冷月明歌散玉樓春
十年不到西湖路辜負先生墊角巾

春日遣興

寶篆香消雨散絲准撩詩興上花枝春風吹度南窻竹
一片紅芳落硯池

竹西為上虞徐習曾作

三徑蕭森綠霧寒東鄰日日報平安
高情直到斜陽外渭水秋風一釣竿

友間錄序

雲間陸蒙氏編縹冊二帙釐為若干卷曰友間錄取聖人友多聞義也携以過草玄閣求引言閱其所錄一時薦紳先生如廣陵蘇公昌齡遂昌鄭公明德泰陵成公居竹毘陵倪公元鎮俱有手墨列其中可寶而傳也夫

豈若三家村僻掇拾猥瑣而遽以自足哉昔李氏有師友談記晁氏有客語涑水有記間吾先子有聞見錄皆取一時師友賓客以纂錄成書也予嘗怪今朋徒有會所談不聞嘉言善行而私議官寺短長爵秩陞降市井庸流之輩否則談諧調謔而已奚有飲食談笑之頃孜孜以紀載為務積以成帙以備他日職史者之資乎夫蒙之以多聞取友從知友之有益於蒙而去其損者又可知矣然予於蒙尚有諗也子之取友得聖門之訓矣

其亦得師於講經討傳之際尊其所聞行其所知乎果
爾則子於聖域將有所造豈止備見聞事實為職史者
計哉蒙尚以予言勉之至正甲辰二月初吉遺叟會稽
楊維禎在小蓬臺試陸貴穎棗心筆書

題舜舉畫

舜舉此圖其以畫滑稽遊戲者也當與柳子厚之蝻蝨
陸魯望之蟲化蘇子瞻之八物同一機軸於世豈曰無
補蒙莊謂東郭子云道在螻蟻道在稊稗道在瓦甕道

在屎溺可以拉圾堆而眇視之耶 王行

故翰林侍詔滕公墓誌

公姓滕氏諱用亨字用衡累世家姑蘇父諱德進母萬氏公年甫弱冠事從父思勉宦遊南北涉歷山川奇瓌益資其胸中所學晚歸鄉里將終身焉聖朝求賢如不及永樂三年有以名聞遂膺聘起家授官翰林侍詔階將仕佐郎預修永樂大典三年考績轉階登仕佐郎永樂七年九月丙申朝退還公館與朋友談笑如平日既

暮忽憤憤昏暈夜半竟歿焉公生於至元丁丑八月初五日享年七十有三娶趙氏無子生女一人貞贅陸浩間訃驚怛奔喪告白於朝蒙恩賜楮鏹給驛舫還遂以十二月辛酉葬吳縣玉山之原予既為銘揭之封墳浩請不可無詞以掩諸幽也爰撫其出處大槩葬之壙中嗚呼用衡已矣予之悲其安已耶王汝玉撰

瓊林薛真人誄文

開府神德君以神道設教三數百輩往而有聞者惟閩

之陳文學近古所謂博大真人哉文學供奉時落魄不
羈以詩酒自汙沒久始贈真人號朝學士大夫述德誄
行未已也蓋能薄聲利外形骸以文章道術相周旋未
始出吾宗而已文學去世踰四十載彷彿其人得薛元
卿氏元卿早侍神德君入有蓬萊道山之遊從出有茂
松清泉之怡悅視文學公差若有檢束至於翰墨跌宕
詩酒淋漓白眼青天傲睨一世則未易有優劣論人當
在逸品上矣今大宗師吳公以耆德重於朝凡執事者

一二十輩皆真人聲光赫奕非下士所敢仰而望且何足以測而識之哉元卿已矣論者獨以繼文學公異時或無用之用諸葛雖死尚能動人元卿其有不亡者存今已睹其兆是為元卿誄不死哉

至正乙酉暮春之初旬曲外史造首為章心遠書一通予將屢書之以識四海之公論如此非張雨暱之而私之也

此予之狂言心遠乃弄於無用之所一展對間既重

故人之思而一載之內雲嶠陳君以卑位往彥輔張君以際遇往獨存者元卿耳雨為無用重識

元卿向留吳篤斯文契誼數相從已而還山中詩文日已精行業日已高且謂予曰今被璽書徵往杭之佑聖觀子幸一來豈料元卿遽沒於山中也鄭無用出杭人張伯雨所為之誄三讀其文而悲之若元卿者方且為古之博大真人游於太微之上夫豈言語文字所能贊美也哉鄭元祐識

鄧善之詩

題文與可墨竹

此君脫穎蒼筤根，修節稜稜見空洞。志士林居增眼明，
歲窮瞥見冰霜凍。我嘗逕造羣籟寂，萬玉陰圍天宇空。
畫圖老可得三昧，遺鱗敗楮千金重。鳳翔青林春向妍，
龍拔老湫雲欲動。斲輪承蜩道之妙，彼哉畫史醯雞甕。
坡仙磊落兩玉人，瑰詞藻句雜嘲弄。渭川奚啻千畝胸，
亦有八九吞雲夢。我今闕山苔溪曲，欲聽琮琤助清供。

二老高風杳莫追笑予匏落知何用

挽薛助教

扈蹕居庸道歸來僕馬疲俄聞痛首疾不見折肱醫靈
旆辭官舍寒毡罷講帷吳興四千里惻惻泣孤嫠
與子俱留滯那知隔古今猗蘭摧露草斷雁落秋陰手
澤遺書畫心喪得子衿溪頭吾卜宅相望竹松林

樂苦齋記

華亭孫鍊師字明叔者蚤以穎敏得鄉里名為鄉大姓

義門夏氏所知遇如其家老綜理以益其富者將三十年至正乙未主人者亡師喟然曰知己者死矣安用屑屑久羈塵鞅耶遂去為黃冠師丙申城毀於兵民無故居義門乃於府城之北鳳凰山之東外波涇之西築室以聚族焉師亦僦地其旁為屋三楹庸以止息曰吾不忍與義門氏子孫遂相忘也予一日過義門且造師坐予於室東之樂苦齋起而請曰子亦知夫齋之名樂苦者乎余曰不知也師曰將徵子文以記之也久矣幸勿

辭予曰好榮惡辱人之常情今夫喜也悅也得意也好也所謂樂也憂悲也窘窮也疾病也禍患也所謂苦也師乃以人所不欲也而曰我乃欲焉是不亦好人之所惡惡人之所好傳所謂拂人之性者乎師曰豈敢試為子陳之吾鄉之人有才幹器局者多出入大家綱紀其門戶以濟其私家故倚大富者為小富自小富為巨室比比皆是方義門聲勢赫赫家之政小大芥細悉由鄙人鄙人欲自為計何施不能顧乃澹泊自嗜若將終身

不殖貨利不置畝畝不事懋遷喪亂以來既無田廬生理日拙官方以無田而號富有者嘗依富人以成家者應命有司鄙人已數數困於是矣其應命也始也剥肌膚今也竭膏血父子不保室人怨嗟貿售市易大而衾裘書冊微而篋笥庀區探索無遺以死為愈殊不知鄙人無田而非富有依富人而未嘗成家者也其苦也孰大於是嘗讀老子書有曰有身有患莊周書亦曰人之生也與憂俱生是凡人之生不能無苦也審矣鄙人既

學其道敢不一死生外形體齊物我樂其存於中者聽其苦於外者如是而已是乃所謂樂也予曰師蓋可與言道者矣易曰遯世無悶不見是而無悔又曰與時偕行繫辭曰樂天知命故不憂安土敦乎仁故能愛傳曰素其位而行素患難行乎患難陶靖節曰貧賤常交戰道勝無戚顏蘇文忠曰平生學道專以持外物之變非意之來正須理遣皆此意也師蓋可與言道者矣昔人有言市中有虎衆皆自若獨一人色慘而意動蓋嘗傷

於虎者也予以流俗所不偶作畸傴東海上處貧賤之
日久矣蓋嘗傷於苦者也貧賤之苦世所不堪予亦以
孔子之道朝夕自娛苦雖稍來亦復謝去終不能疊疊
逼人間師之言乃知世固有同於予者如是予與師苦
雖不同樂豈有異耶師先君子之所愛也予不敢替其
愛敬為師記之

張雨

映雪齋

記

映雪齋者雲間孫明叔書室也室邇素王燕居之宮明叔幼習俎豆禮遜溢於目詩書熟於耳既長見益多聞益博學日益進所蓄經書幾千卷若注若疏若解義諸氏之說備焉史千卷若紀傳若書志歷代紀載萃焉子集又千卷筮史醫師方伎之精者古今名賢墨蹟之真者聚以類焉闢一室序次甲乙而尊丌之題曰映雪蓋希其先世之勤於學也而或者疑焉夫勤學而雪是映本由於膏之不繼今明叔非不足於膏也映雪而讀一

時適然雪亦非常有而可快也而是之名何居辭之者
曰齋之中素壁四環紙窻潔幽籤牙之垂垂軸玉之疏
疏其境皆雪也皓魄欲沈晴烏未翔曉色漾乎書帷寒
光耀乎虛極景又無時而非雪也指送瑤琴之彈手映
玉塵之揮清談而屑霏唾咳而珠玉則雪在乎其人濯
宿汚於蟬蛻來新見於融冰湛然虛白皎然靈瑩則雪
又在乎其人之心是則雪雖不常有而吾雪則常有也
雖焚膏而讀而吾之志則常若映雪而讀也明叔其賢

矣哉予嘗卧衡門釣寒江東櫂剡溪北上燕山交是雪
久矣江空歲晏梅花欲春扁舟下松江明叔邀予坐齋
中焚香讀四聖人易但覺夜寒窻白萬象昭然時至正
丁亥十二月三日番陽傅貴金子初記

詩

新裁鶴氅著來輕儼若冰壺不夜城展席繡書延倒景
煮茶敲火送深更千山玉立神逾爽一室清虛眼倍明
座上高談無雜客蕭蕭白髮可憐生

陶宗儀

鶴齋詩 有序

茂宏薛君臨以朱公本初高第弟子也公至順庚午
如還道中諸詩蓋無媿杜工部石壕吏無家別諸篇
茂宏為予誦之為之感激有少陵慕元使君之意茂
宏清雅善學其師尤工於詩旨趣不異自名其齋曰
鶴昔薛少保畫鶴動衆雖久泯沒每誦杜句慨然有
凌雲之思焉故以是望吾茂宏也乃賦詩贈之

每吟少保郊郊篇畫鶴仍為世所傳羽翮已超千仞表

風騷遠軼六朝前
兒孫有志翔寥廓
妙句相貽起靜便
今日名齋深屬望
雪絲雲錦看冲天
青城山樵虞集

至正九年青龍在己丑
仲秋上戊日天子有事於太
社太稷素與執事禮成歸金臺坊寓舍是日雨潦無
過客因錄青城先生鶴齋詩以寄薛君君里中有張
生兄弟善刻字當刻此詩於晚圃堂中蓋先生久捐
館舍其文章不可得矣素書無法不足道也華蓋童
子危素識

有元故薛君思永配倪夫人墓銘

至正十年夏元儒薛毅夫葬其太夫人倪氏於信之貴
溪縣同耕原其友臨川危素方在史館屬其外兄桂孟
書其世出言行欲來求銘居無何汝潁盜起道路隔絕
後一紀始克航海至京師以請於素不敢辭也按夫人
諱瑞真姓倪氏其先在南唐時有信州雄石鎮鎮遏使
官至銀青光祿大夫奉化軍開國侯父恕軒先生母某
氏生至元二十七年八月時見北斗光燭於庭父母異

之年十九歸同里薛君昶思永其字也君之父晚有足疾不良於行扶掖起居供饋飲食必身先之父或謂之曰宜自讀書不煩爾也對曰奉親餘暇方是讀書之時上有太母夫人復從容曰妾當親為治具以養曾祖姑為學不可廢也君有父喪慟哭過哀人不忍聞懼傷太母之心既葬則哭於他室夫人開釋之終莫能止每見太母則歡然改容服除竟以憂邁疾卒曾祖姑方涕泣慮無以為葬夫人乃盡出嫁時衣服簪珥以為棺槨他

日撫二子曰汝大父嘗窘於徭役亦不知遽至於貧唯
日夜望汝成人以興吾家他日得從爾父於地下足矣
哭幾至絕由是堅苦自持蠶桑紡績得繒布奉曾祖姑
餘以資教子之費既長則又訓之曰外人多言汝勤能
鄉學使汝父及見之喜當何如輒嗚咽流涕曾祖姑喪
伯祖姑議均財治具夫人請曰所積錙銖豫備之矣人
尤以為難能歲時祭祀必躬親俎豆無違於禮至正八
年十月戊辰得疾越五日壬申沒得年五十有九子男

二毅夫其長也次餘祥先卒孫男一人薛氏之先亦仕南唐為司徒乃徙貴溪之漸步里五傳至宋朝奉郎尚書駕部員外郎上護軍昌弼又六傳至脩職郎金溪縣丞玠君其曾孫也兩家俱著族云銘曰

女婦之德由教而明維薛與倪世有簪纓婉婉令容訓戒是承爾行之孝爾節之貞鬱鬱松栢原曰同畊為善之徵被厥雲仍通奉大夫叅知政事同知經筵事提調四方獻言詳定使司事臨川危素謨中奉大夫同知太

常禮儀院事鄱陽周伯琦書

藏經銘

北斗道經一卷故太史清江范梈所書貴溪薛毅夫奉
而藏諸禹穴承母命也母倪姓諱瑞真世大族生於至
元之庚寅生之日父母睹北斗光燭於庭故長而事斗
極虔日誦其經年十九歸薛昶氏昶蚤卒時甫三十孀
居卓偉訓毅夫詩禮為名士毅夫一旦過清江謁太史
告以故太史為書經碑之歸遺母母得之喜曰比夜夢

汝執經我側今致此非偶然也吾百年後可藏諸名山
慎勿忘暨毅夫太母喪乃上會稽詣禹穴藏經已而屬
太史氏襄陽張翥為之銘銘曰

禹陵之洞陽明虛中閔玉匱遁甲圖孰敢窺之神所徂
有孝子毅精誠孚斗七宿經史栞書元默攝提月在如
翥也作銘古作模歷厥世百文弗渝後有道者其徵且

贈鶴齋詩

并序

鶴齋隱居浮海至京師為其母夫人請銘於中書叅

政危君既得之復來吳謁予求篆題并以翰林承旨
張君所作藏經銘求予古篆恐難其書賦三絕句以
請予嘉其篤孝即書以貽之仍次韻為答時至正癸
卯季春上吉也老友鄱陽周伯琦

蓼莪報德自難忘浮海飄然一葦航萬里得銘如見母
何慙蛇蚓助餘光

陝郊古句人爭誦義訓猶知教一經慈範堂堂傳百世
故應玉樹長階庭

共望江東日暮雲吳門六載對殘春論文何日同尊酒
但恐詩成泣鬼神

九月一日訪鶴齋於上清別館擬邀小酌適其生
朝有出戲書此為明日之約

蓬萊宮中尋薛濤芙蓉城裏去遊遨常騎仙人兩脚鶴
何處阿母一蟠桃菊花邀客易成晚竹葉於人安所逃
步虛一起且歸去明日與君持蟹螯

青城山樵吳集

用先叔祖韻壽薛鶴齋真人

近以兵避海上會鶴齋真人于練川語及舊遊皆如
夢寐因誦先叔祖太史文靖公詩乃為真人九月一
日生朝賦也今俱客於此復逢此日而誦此詩感懷
今昔三十年矣於是堪不能無述謹用韻以為壽云
練海秋潮若捲濤遼天得與鶴同遨人間不老三花樹
天上初分五色桃甲子每書聊自託姓名千載復誰逃
等閒談笑重陽近又向尊前一舉螯

虞堪

次韻

青城文思涌波濤子復長吟海上遨瞻望白雲歌伐木
記從瑤水得餘桃百年風雅誰能繼萬里烟塵共此逃
不是菊花知節序一枯負却蟹雙螯

薛毅夫

游靈巖三首

吳宮花草久為塵千仞空山嫵黛新雲閣面湖春渺渺
天池浸石碧粼粼諸侯互勝猶爭奕三世如來却現身
白社楫間留秀氣清遊湍占及芳辰

升梯百折到松林連抱庭杉歲月深永巷廊虛曾響屐

荒宮臺古不聞琴蛾眉傾國悲生樂麈尾談空後視今
山下良田明似剪一畦那得老雲岑

重游已隔十三春纖綠嬌黃歲度新白髮無情添老態

青山有約待詩人菜花間麥畦搞錦薜荔縈藤樹簇鱗

香逕斜陽啼杜宇迴舟圓月掛城闌

周伯溫

玉鸞傳

玉鸞者蕭氏子也小字阿鸞按蕭氏有二派俱以音律
知名其一居大夏之西曰筠有直節黃帝時伶倫用之

定律呂筠再世孫龍贊舜作韶樂樂用有成書曰蕭韶
九成鳳凰來儀是也其一隱昆山之麓曰璞以抵鵠得
名卞和屢獻之楚懷王不用遂匿德不售子貢稱其韞
匱而藏求善賈而沽者也其後子孫遷徙無常處惟居
藍田荆山者最盛鸞藍田人也初育於石氏當秦皇帝
并吞六國有天下薄海內外瑰怪珍奇瑋異莫不效職
惟石氏幽然不為用帝怒盡驅其黨填東海通道蓬萊
閭苑以求神仙不死之術中道不行被鞭至流血石族

以破鸞無所依乃脫身游關陝關陝豪俠愛其溫潤縝
密廉而不剝氣如白虹以為奇寶為之語曰豈有美如
鸞而長貧者乎鸞雖美貌然無他能解自以落魄關
陝十餘年靡所成立發憤從宗工磨琢一旦心孔忽開
於其祖音律不學而通每風清月朗碧天良夜輒一鳴
焉而蛟龍為之起舞鸞鳳為之迴翔聞者莫不軒昂激
越而手舞足蹈也然未嘗自鳴必待人掄揚吹噓而始
出聲脫非知音者雖王公卿士卑躬下氣萬方冀其鳴

亦不肯曲徇其意而一鳴也遇知音則鳴不已君子謂其不近人情而斥之鸞固自若也句吳顧瑛遇鸞吳門市邀至於家既而太史楊公有狄生號鐵龍者亦以音律鳴聞鸞技與已同一見甚喜遂不相舍朝夕更倡迭和如親昆弟至今留楊氏云

太史公曰鸞之貌美矣然闕其中則洞然無有校其能則惟音律而已音律於技末也其不遭宜矣噫以鸞之姿而所就僅爾諺曰人不可以貌取信夫

釋堯新

孔方傳

孔方字子貫首山人也其系出金天氏黃帝時為童氏
黃帝命鑄鼎荆山下鼎成有龍垂胡髯下迎黃帝騎龍
上天童氏遂用有名天下夏商之際童氏益振入周為
孔氏武王伐商孔氏有曰泉者以神術行天下太公立
九府圜法而泉與焉其後子孫散處諸國在魯者佐季
氏故季氏富於周公在吳越者范蠡用之而資埒王者
孔氏至今族號最蕃惟方能傳其祖神術隱首山陶冶

中師事容成而名益著四方咸以兄呼之漢高帝既平天下中外消耗思振元元而大臣有以方為言者帝甚喜乃遣使召之方乘傳車至闕下問以富國足民之道對曰顧所謂力行何如耳頗甚稱旨使典府庫以權出納文景之世方儲蓄累百鉅萬貫朽而不可校天子嘉其績累遷至平準令未幾人誣方盜鑄禁錮不用方為人無圭角與人交無高下雖孩稚亦與狎玩吳王濞之國上大夫鄧通寵用而方奔走導通之門無虛日平居

好聚無賴子弟為賭博之戲贏輸皆由已為有不可意者雖袒跣大叫祈為梟盧亦不肯少徇為之故往往致喧爭鬪毆人頗銜之此其所以獲罪歟先是有燕人楮寶者亦以神術顯用初方赴召抵京見寶喜其術與已同驩如平生遂同舍館出入與偕而寶素輕薄不逮方之剛厚也二人意雖甚合然方遭難而寶卒無一言援之吁真市井之交哉方既罷而寶專任使權益重有偽寶名而為非軌者朝廷患之議復用方以分其權於是

丞相弘羊言於天子曰孔方有功國家而其才足以任使以非罪黜不復非所以示天下之意制可其奏召方復平準令方起而實權果少殺二人並行天下人莫敢先後輕重焉朝廷凡欲建大功興大利非二人不可以故上自天子下逮公卿大夫靡不愛重二人者二人俱口吃不善言語惟以篤實見信於人中外百司之事人所難言者二人至無不可雖臺諫風憲亦嘗曲徇其意方尤利濟於貧窮小民故天下聞方用而莫不稱慶廢

而莫不失望蓋方之術足以動人亦天下人心之所欲也寶以昏自焚死方亦以年高身皆土色顏面無精采告老於朝賜爵同城予自便終於家

太史公曰孔方起陶冶中獲親任使斥而復用其遭際豈偶然哉方雖名通神術而無他竒能解不過聚歛而已然而天下無賢與不肖皆忻慕而愛重焉不知其何道可怪也已

釋克新

右二傳江左外史釋克新仲銘所作刻於雪

廬集

陶先生遺墨

劉嵩高文藁序

嗚呼三代以降士之作者多矣求其立言有益於世道而為人人之所稱誦者幾何人哉或者謂世道有隆汙故文章亦與時相上下此固然矣然人各有所能所不能固不可較優劣於異代而亦不可較優劣於同時何也人之為學本於質性充以見聞根於義理徵諸故實

而見於是是非莫非道之所寓譬之植物之生大者
小者長者短者堅者脆者其生各因其性其榮悴開落
各有其時要之皆有可觀者焉如使其大小長短堅脆
者皆歸於同類而榮悴開落亦同見於一時又何足以
觀造化之妙哉惟夫人之立言也亦然人心各有所志
故其言皆可以傳於世作者不厭其多也予友四明劉
君顯仁讀經史百氏之書肆意於古文士大夫多君之
才咸稱譽於君不置四方學者咸師宗之凱辱與為友

日以道義文章相刮劘故其相知為尤深歲己丑予裒
名人文將次第而傳之至君則語予曰吾為文用心良
苦抑不知於道果有合乎否也子幸取而刪之予謝不
敢當歲庚寅君領薦北上予為縣文學信之永豐與君
別去辛卯君下第南歸授嵩高書院山長俄而以疾卒
卒時遺言謂所主賈君侯予東還必以遺文為託其文
凡四卷為若干篇君年二十即負文名嘗一再至京師
受知名公卿壯歲客武林與予友凡十年予見君所為

文甚富今所存僅僅如是則知其所遺亡者多矣予續
當搜訪乃為編輯庶不負君之託也嗚呼予每評君之
文其大者若梗楠其勁者若松竹其艷者若桃李其幽
者若芝蘭無不各極其至而其立心懇懇然專務以忠
言善道告人未嘗苟措一辭也非古之立言者歟嗚呼
今已矣後之覽者庶有徵於予言哉至正十四年七月
十有九日天台陶凱序

永豐令宋侯興水利記

東平宋侯筮仕由中朝出為永豐令侯樂易敦重與民
相安於無事適隣郡有警官府多故侯調度不煩民用
寧謐及寇入郭郭竭力捍禦民居安堵其於學校農桑
知為教民之道養民之政蓋常拳拳焉暇日會民父老
語之曰古井田畝澮溝洫之制度廢於是有渠堰陂池
瀦水瀉水以防旱澇使民無饑孥之患然不豫備則惠
不及民夫民不可與慮始而可與樂成衆盍相與圖之
於是捐俸金為倡率有力者募民子弟增築縣之陂池

以東灌橋旁學佛者吳普諒有幹才可以集事使專董
是役遂築東灌陂三百丈馬樓陂二百丈忠良陂一百
八十餘丈楊淤一百丈坳丘五丈蓮湖五丈塞門八十
丈魚門諸陂凡一百丈不日告成水之所經凡四十餘
里灌民田十萬餘頃歲大旱林木多槁死獨陂田大稔
其自今以始民獲享無窮之利皆侯之力雖古之鄴令
史起何以尚諸民父老以狀來求紀其事於是乎書侯
名詳字約夫云是為記又系以詩曰

維此豐邑厥田磽瘠耕鑿之民歲食其力雨暘時若泰
徐其宜驕陽為災歲乃大饑職維宋侯力於農田制防
築陂民用有年耄耄童髻懼忻鼓舞曰維賢侯民之父
母紀侯之功頌侯之德我用作詩勒之貞石

題夏簡伯畫

西南遠山隔流水山色蒼茫烟霧裏東西諸峰氣勢高
層崖絕壁連雲起岩隈野人屋數椽白石齒齒泉涓涓
橫坡歌岸接林杪有路可上層崖顛道中行人問前路

只愁空山白日暮山南樓觀已在眼相期尋幽須奔鶩
稍過前村水亂流危橋直上岩之幽一客騎驢看飛瀑
一客抱琴凌素秋終日山中行未了大山小山看總好
人間茫茫行路人何如山人拾瑤草刺船東歸何太遲
泊舟岩下聊娛嬉一船生涯在烟水咄哉世人安得知
東來西去各有適飄飄清風生兩腋村深雨露足桑麻
是處山中堪躡屐夏君愛畫入骨髓足跡江山數千里
興來寫此遺故人終日披圖為君起君家斗城吾赤城

山深夜夜鳴秋聲同是天涯倦遊客吟詩到此猶含情
好事珍藏莫輕擲人間好畫不易得時向亭齋一卷舒
中有天機人莫識

妾薄命

紫宮三千人非闕妾命薄請君聽妾言臨風氣蕭索妾
家在江南高樓映城郭二八顏如花重門蔽珠箔一朝
別親知凌雲上窳廊得充君後庭香風動羅幕丹鉛為
君施衣裳為君著願以微賤軀匡牀代莞弱流連愛景

光誰知風塵惡層城隔川梁紅顏歎漂泊月明烏夜啼
更深露華落對此情鬱紆形容不如昨君恩本自深妾
身非無託願君布陽和聽妾奏羽籥絲竹皆前陳酒漿
為君酌南山以為尊北斗以為杓奉君千萬年與君恣
歡樂

留別

千里江東客三年是冷官風塵驚戰伐骨肉喜平安歲
暮思歸切交深話別難臨期各回首相視涕闌干

歸舟

亂後歸東浙清湖買小舟交遊皆遠送懷抱復添愁細
水灘行盡荒邨野趣幽前程山色好早晚到杭州

東岳行宮重建天堂記

昔先王教人以禮樂使入於善有不然者則刑政施焉
後世禮樂壞而政刑紊於是方外之教以禍福示人始
有天堂地獄之說猶朝廷以待士大夫而囹圄以待罪
人使善有勸而惡有所懲亦世道之一助也然而世變

愈下昧其所趣者不竭力於善而竭力以事神蓋謂事神可以獲福雖有甚大惡神亦將庇庥焉嗚呼此豈其立法之本意哉永豐地僻民淳其君子咸知禮樂之化其小人能安其生業而其事神甚敬水旱疾疫必禱於神進退趣舍必稽於神距縣治西北一里許有東岳行祠舊建天堂地獄於祠之東西相向以為善惡勸懲之所天堂舊基汙下殿宇湫隘歲久復頽圯若不稱其名無以起人之敬住持博山寺僧源公石泉將撤其舊而

新之度地於舊基之東數十武廣袤各數十尺其地高
敞厥位面陽衆咸以為宜乃捐衣鉢餘貲又募衆財鳩
材僱工擇其徒之能幹蠱有定力者曰道隆使董是役
邑耆長徐亨甫韓慶叔實贊成之道隆躬操畚鍤鑿山
開址四方之士翕然皈向輿木運石至無虛日經始於
辛巳六月落成於壬午八月為浮圖與水陸堂龍象之
飾鐘鼓之設粲然聿新左為層樓右為迴廊雲堂居前
方丈在後花木周匝逵逕靚深其規模氣象視昔加倍

跡其地者恍若出塵世下至廩庫庖湑及日用飯食之具靡有不周道隆乃諭於衆曰今功緣粗畢而無恒產後之主者一怠其事則前功隳矣夫善始非難而善其終尤難盍思永久之圖庶其可乎衆遂相率捐田歸之凡若干畝歲徵其入以給瓜華之供與繕脩之費焉予職校官永豐道隆請紀其事饒諸堅珉又刻捨田姓氏於碑陰以垂不朽云予既為記又系之以詩曰

佛有象教式昭庸愚厥名天堂龍象所居其居伊何有

嚴有翼金碧焜煌仰瞻兢惕生為君子沒為明神善惡
之報職由斯人睠茲山川民俗淳古作善降祥受天之
祐鳩材構堂人民具來爪華繕脩捐田資之道隆之功
衆士之力彌萬千年有永無斁

送姚憲史赴浙東

東南壓天低雲城江樓日夜間雨聲掾曹牽帆上水去
厭見江頭波浪生嗚呼山有猛獸水有長鯨鵠梟晝噪
狐狸夜鳴西郊烽烟接戎壘朝廷連年常用兵去年夏

早米價貴今年民饑誰力畊
公家軍需星火急村墟訛
言民屢驚搜材不復間遐邇
志士攬轡思澄清茲行執
筆在栢府片言良足為重輕
能為國家樹根本要在剗
惡存鰥寡邊城烏棲白日暮
烏啼啞啞天未明哦詩壯
子遠行色馬首青山相送迎
諸子虛席久迂子共佐明
時致太平

竹梅幽禽

竹外一枝梅
花開雪初凍
風來莫吹竹
恐驚幽鳥夢

梅蘭圖

梅花與幽蘭芳馨在山谷折以遺所思其人美如玉

送張伯達序

予往年嘗讀昌黎文見其稱殿中侍御史李虛中以人
始生年月日時比其支干以推其休咎而預定之予心
頗信尚而未能得其要領聞善論子平家法者予輒就
問其說頗聞由虛中數傳而後為子平虛中主用年干
子平用日干皆主其所生而以尅者應之若源流一致

故虛中子平之說雖不同而所以為生剋制化未始不
同也然則子平其善用虛中者乎獨怪世之言子平者
以某支辰藏甲乙某支辰藏戊己紛亂而無所統攝蓋
惑於多歧而不能考其會通者也永豐張伯達學子平
法以主客相附麗而求其會通井然各有條理暇日予
以生人之時日有富貴貧賤夭壽不齊者試其術而伯
達操論甚整殆百不失其一焉茲告予別將往遊江湖
間予因與伯達論曰人生於父母而稟於天地之氣乃

以始生年月日時推其行運又推其行年以考人之休咎彼始生之時日於今吾果何與哉抑不知有象而有數此自然之妙也夫成吾形者實五行之氣於是而有象矣然始生之時日固吾形之所以生於是而有數矣故五行之氣在於吾身而其行運行年正吾身血氣流行呼吸吐納與四時之氣相為通貫者氣順則休逆則咎如斯而已又何不可以數推乎雖然一日十二時一月三百有六十時一歲大抵為時四千三百有二十而

四海九州所生之人有不可以萬億計其富貴貧賤壽夭果皆同乎否是生人至多術數所不能限也以有限之術數推無窮之生人欲其一一皆中亦憂憂乎難矣嘗觀物之草木春生夏長秋殺冬藏此氣數之常也然其間有生長同時而凋謝不同時者何哉或其地利有肥磽物性有堅脆又或封植之或斬艾之故萬有不齊也人得天之氣與地之氣而生於父母之身是兼於三才者今所論年月日時特其得於天者耳至於山川之

風土父母之家世則其因乘之勢有不同也又況其所存之心能樹善積之久則氣順而不逆反是則氣逆而不順由是而求其休咎之應又豈術數所能拘之哉以伯達善用其術而又參考於是彼有無窮之人則皆以無窮之變應之是子平善用虛中而伯達又善用子平者也何患其不一一皆中乎江湖多賢士大夫必有能知伯達者尚以予言論之是為序

信州路太守于公遺事

論人以跡而不以心者乃世俗之常談非古今之通論也是以予觀於信州之為人混其跡而無以白其心抑亦命也夫予居武林時公為信州比歲餘人爭言公有貪名而無善政大夫士皆譁然攻之莫能諗其故也及予為信屬縣文學詣大府謁公見公謙讓愛士尚儒術也勤勵庶政共其職也吏畏之威之行也民懷之惠之施也事有未當官屬得以言之能聽諫也法有未便衆庶得以陳之能取善也搏擊豪強攻其首惡而已紛

爭辨訟審其曲直而已四境之內富者安其業貧者遂其生苞苴不進也請謁不行也然而私昵之愛弗能禁之奴隸之奸弗能戢之明於遠而暗於近也治其大而忽其小也此人所以爭言公之有貪名而不知其有善政也嗚呼世之人好論人之跡孰有明公之心者哉去年夏淮寇猖獗既陷蘄黃又攻襄漢襲破武昌公得報形憂於色每戒官屬輕刑弛禁賑窮調乏曰小民無知易以為亂宜善撫之也今年春寇攻江州城陷州守李

公死之公間為之慟曰天不慙遺善人乃至斯極乎未
幾又陷饒州饒與信接境而信萬夫長以病卒其偏裨
與其麾下多從征南徐又往鎮池陽存者甚寡衆懼力
不能支請公為自全計公曰臨難不苟避此吾職也吾
行何之遂命其子奉母以行曰若等善自愛以承宗桃
吾得從李江州地下游足矣已而寇至公守義不屈求
死不獲卒為所擒居道上不食死嗚呼死非難而處死
為難寇乘勝遠戰歷數千里將士卒者棄其士卒守封

疆者棄其封疆往往有平時得名譽士也能如公見之
明守之固確乎其不可拔者豈易得哉予懼人之不知
公故述其梗概如此苟以予言質諸信之士與其民必
以予為知言予非有私於公也公名大本字德中云

座右銘

夫學以明其道以脩其身也仁義人之性也孝弟人之
本也禮讓所以接人廉潔所以自守也人慾必禁於未
萌天理常防其易昧也小善不可以不為小惡不可以

不去也動靜必貴乎交養言行必期於相顧也能知之而弗能信之是知之弗真也能信之而弗能守之是信之未至也知之真信之至守之固行之篤其庶幾乎君子之道也

送沈仲達內掾北還

昔年遠客辭東吳長揖公卿游上都有如彩鳳出丹穴
飛集明堂衍瑞圖今年走馬江南路極目春雲滿江樹
又如騏驥產渥洼長得孫陽一回顧江頭昨日秋風起

聞客逾淮度江水秋風蕭蕭河水渾送行千里若萬里
開筵祖道江城西空林野鳥方亂栖主人酒盡客亦去
落日城邊散馬蹄雲黑雲深夜間雨壯士憤激毛髮豎
臨風長歌拔劍舞誓掃妖氛報明主到京八月秋雨涼
書來有雁煩寄將小臣葵藿傾太陽願見聖道如天長

題襄陽山水

屹立青山漢水邊山中臺榭幾千年於今耆舊消磨盡
却憶能詩孟浩然

右陶先生遺墨五紙舊得於一士友家每紙
有名氏印章字畫清勁可愛紙亦佳墨色如
新又可寶也錄此一過

淵明醉歸圖

題跋

千古淵明避俗翁後人貌得將無同杖藜醉態渾如此
困來那得北窗風

大癡道人時年七十八

歸來三徑一年秋自是羞看爾督郵王弘斗酒何為者

不見南山不舉頭

張雨

王生持叔厚白描淵明小像來求贊時僕被酒信筆寫
四句而句曲外史即刻而成詞意深遠尚有餘妙嘗記
張西岩有一篇甚好議論遂寫其上云留侯晚節遊赤
松武侯早歲稱卧龍仇秦復漢身始終淵明初非避俗
翁兩侯大節將無同陽秋甲子法王正直筆宛有南山
雄易地灞上祁山功王弘何幸奉吾足督郵能芥平生
胸歸來種豆南山中斜川只許桃源通門前五柳春濛

濛落絮不與江波東環堵蕭然吾未窮北窓儘有羲皇
風畫圖不盡千古意作詩一笑浮雲空

有黃子久印

淵明詩曰但恐多繆悞君當恕醉人東坡謂此淵明未
醉時語一峰老師書此篇當亦在未被酒前所作正得
古人佳趣雨云

前詩盧疎翁所作今以為西岩則又似乎被酒之餘也
句曲外史

趙魏公畫卷

題跋

予自少小愛畫得寸縑尺楮未嘗不命筆模寫此圖是
初傳色時所作雖筆力未至而粗有古意邇來鬚髮盡
白畫乃加進然百事皆嬾欲如昔者作一二圖亦不可
得右之要予再跋故重書以識之 孟頫

右之邇來苦心學道不畜長物故此卷亦復棄置姑蘇
金寶之收而藏之誠好事哉 子昂

右先平章初年所作幼輿丘壑圖雍正十四年冬被

召入京師待制集賢十六年秋航海南還十七年春至
錢唐琴川鄒伯常復以見示拜觀之餘悲喜交集展玩
不能去手伯常宜寶藏之三月廿五日趙雍謹書

此圖乃先大夫魏國公早年所作真蹟無疑至正丁酉
四月甲子拜觀於會稽之寓舍趙麟謹書

濁世公子何翩翩風流丘壑妙當年無端却被鄰娃惱
不廢嘯歌猶自賢

小齋松雪對青山波上閒鷗自往還文采風流今不見

空餘粉墨落人間

京兆宇文公諒

伯常避難東徙家貧如山委棄不復顧戀獨珍
惜此畫不忍使失去客中時一展玩輒欣然自
慰雅好異於流俗深可敬也并書二絕於後

萬金家產不復惜特為會稽山水來行李只留松雪畫
時時展玩旅懷開

知君雅志在丘壑况復風流如謝鯤此景人間何處有
便堪避世似桃源

咸亭侯風流任達自謂一丘一壑過於庾亮今觀趙
文敏用六朝筆法作是圖格力似弱氣韻終勝披卷
之餘令人遐想幼輿公清歌鼓琴於千載之上王阮
之徒有不及者至正辛丑閏月廿有六日會稽抱遺
老人楊維禎在春夢軒試郭玘墨

乙巳十月八日錄東原家鈔本

書評

右宋人十一家書表表著見者常試評之李西臺書去

唐末遠猶有唐人餘風歐陽公書居然見文章之氣蔡
端明書如周南后妃容德無備蘇子美書如古之豪俠
氣直無前東坡書如老羆當道百獸畏服黃門書視伯
氏不無小愧耶秦少游書如水邊遊女顧影自媚薛道
祖書如王謝家子弟有風流之習黃長睿書如山澤之
臞骨氣清澈李博士書如五陵貴游非不秀整正自不
免於俗黃太史書如高人勝士望之令人敬歎米老書
如遊龍躍淵駿馬得御天然秀拔誠不可扳也丙戌十一

月廿一日大梁趙孟頫書

薛道祖薛昂之子黃長睿黃履之子二父皆邪人而
其子廼以善書知名士亦不可不游於藝哉子昂此
評乃是效米老也紫陽山方回題

小窻剪燭聽雨偶閱叔升錢君所畫古木寒鴉小
景不覺技癢因寫蘆洲聚雁以配之適友人黃德
謙在坐曰似瀟湘水雲景也昔年過二妃廟今復
觀此圖恍若重遊但少苦竹翳深耳予遂添叢篠

於其間殊有天趣并賦詩一絕云甲寅春三月脩
禊日朱孟辨在西掖記

夜窻聽雨話巴山又入瀟湘水竹間滿渚冥鴻誰得似
碧天飛去又飛還

饒介之詩一帖

病中對梅花一株欣然有作若有會也錄似西
塾孟載季迪兩先生一笑介頓首

病中雅量豈堪論澄水能清撓即渾除却妙香無長物

祇應靜坐洗煩言
幾叢晚菊今耆舊
一樹寒梅老弟兄
曾住鍾山安石里
傍人猶恐我爭墩

書後見剡紙就寫上所有者夜坐一首

學默三年漫不謗
流光一去意無徵
緣如髮白因循染
道似山青自在凝
猶有形骸生影迹
却將文字寄名稱
一川月色多於水
更著秋霜見底澄

夢中一首

流水無心競孤雲
與意同坐深明月
下行盡亂山中花

落聞啼鳥松涼愛御風懸知皆夢境一笑萬緣空


至正廿五年十二月十日在采蓮涇梅花樹下寫

王叔明詞

余觀邵氏見間錄宋南渡後汴京故老呼妓於
廢園中飲歌太白秦樓月一闌坐中皆悲感莫
能仰視良由此詞乃北方懷古故遺老易垂泣
也予亦嘗填憶秦娥一闌以道南方懷古之意
花如雪東風夜掃蘇堤月蘇堤月香銷南國幾回圓缺

錢塘江上潮聲歇江邊楊柳誰攀折誰攀折西陵渡
口古今離別

自更靖康亂後中土歌曲皆淫哇之音能歌憶秦
娥者甚少有能歌者求予畫故為畫此詞之意



珊瑚木難卷七

欽定四庫全書

子部
珊瑚木難卷八

詳校官中書臣孫溶

編修臣程嘉謨覆勘

總校官原任中允臣王燕緒

校對官助教臣羅萬選

謄錄監生臣李觀光

欽定四庫全書

珊瑚木難卷八

明 朱存理 編

鮮于公詞一帖

近覽鏡白鬚漸多戲作滿江紅長短句繡江先
生拜求一見敢錄呈醜幸乞一笑鮮于樞頓首

詩酒名場人都羨紫髯如戟今已矣星星滿領不堪重
摘衰老自知來有漸春華料應今難得賴此身健在寸
陰留還須惜也不怪軒銅直又豈怕青霜逼看匆匆

總是這般駒隙生死百年朝有暮盛衰一理今猶昔問
人間誰識魯陽戈杯中物

虞邵庵詩一帖

奉寄都運大叅相公聊致久別企仰之萬一采
覽幸甚虞集頓首

計相淮南重檐帷海上還頻煩紆智略周慮及疲孱調
鼎公宜早歸耕自得閒常携相贈策扶老向江山

集至逍遙山見饒紫巘聞將適瓊華之囿當以舊識

瞻承風采因得附此起居紫巖玄門耆宿之士退食
之暇必能少從清淨無為之論遙為傾企二月五日
集又行

楊鐵崖詩一帖

我尋天上張公子新買江南宅一區桂樹小山金作粟
芙蓉秋水錦成株青龍繞屋潞三斛翠鳳當門銜一珠
世事紛紛何日了好將真樂問堯夫

至正丙午秋七月四日放舟龍江入艾浦訪文湘翼

之張侯留飲於真樂齋席上賦詩一解率座客子山德
昂兩進士用韻成什會稽抱遺叟楊維禎明日在任
老人讀易齋試新製鐵心頽書

余日強詩一帖

四韻詩奉答大章貢士見寄之辱

臘日放船歸泖上滄灣遲子渺愁予河東有賦煩傳送
此月無冰又可書老鐵一錐能取紬庾郎二寸豈忘魚
明歲門生求座主相看喜色動皇居

臘月八日客堞上余日強再拜

又一詩奉上鐵崖先生先錄去一過覽後當別
寫上也

楊子十年官不調才高白首尚為郎因觀禹迹多留越
為愛西湖又入杭仕宦豈無三語掾風流誰似四明狂
水南水北題詩遍猶憶吳中錦繡坊

倪雲林詩

正月十四日舟過吳江第四橋大風浪中貯水一瓢而

去乃賦小詩曰松陵第四橋前水風急猶須貯一瓢敲
火煮茶歌白紵怒濤翻雪小停橈是夜泊舟吳江城外
人家水月浩然與希言嘯詠久之明日題壁詩曰人家
近住江城外月色波光上下天風景自佳時俗異泊舟
閒詠白雲篇十五日與希言謁三高祠望江上諸山為
寫隔江山色圖并賦詩贈別白鷗飛處夕陽明山色隔
江眉黛橫試看三高祠下水悠悠中有別離情十九日
雨留陶蓬戲寫遠樹石岫并錄三詩用發一笑

倪瓚

尺牘

鄧文原一帖

原頓首再拜總管相公本齋先生閣下文原不意慶門
為禍所倚堂上竟以微疾奄至大故聞訃驚惶曷能為
情然壽母以貞節終始有子克盡孝道為時良二千石
亦可無憾九泉矣銘文見委義不得辭屬體中畧苦風
寒而來使以河水不能久留未免力疾屬藁且繕寫納
去其於發潛德則未之有取也遺貺益重愧慙地遠不

能引却悚然而已人還率爾具復冬令嚴寒惟順理節
哀是禱總干照察文原頓首再拜

來喻一一為嗣明言之自有書奉答銘文中為字有
失筆別篆紙末壽康菴記來使趣行當行驛使便納
上

杜清碧一帖

本頓首再行尚書相公本齋先生文侍舊臘衛易晉拜
旌麾之下辱賜教言殊慰積年仰慕之心宴贐稠疊禮

意隆至何以克堪惟深愧感而已別來伏想福祥至止
百神翼衛大酬士民之望旋膺鈞鼎之任至慰至慰本
擬以正初抵杭方聞江上有阻遂自泰興江陰展轉流
滯二月初方達吳門得會季野舍人同到金井山中瞻
視岡巒形局寬大氣勢雄偉與聞相合謂為福壽之基
亦頗如諸名公所論而鄙淺之見尚有可疑者蓋入手
脉直下稍長則乘氣勁急倘稍加轉拓庶合古人增高
益下趨吉避凶之說必欲如閩中龜蛇之地山盡水聚

生意茂蓄則未能悉其造化之妙亦非面對不能詳盡
惟高明裁察茲因人便謹奉起居以致謝私并敢獻其
一得之愚蕪率伏祈恕亮餘惟為國家衛愛式副對揚
不備二月十八日客吳中杜本頓首拜上呈

歐陽文忠公一帖

玄頓首再拜季野府判相公仁友玄於左右雖踈而英
譽稔甚矧於先清獻公實有一日之雅向歆克肖契誼
不殊相望千里之遙情親對晤有以也夫近者承季道

雅盛以清獻神道碑見屬既而傳旨下諭不敢以病僊控辭已繕寫付李德今聞託張德常轉達第媿無後罹憂百感交集何能發潛光之萬一太湖多善碑材刻成以拓本見寄為幸德常附海樍行匆匆亟奉起居草畧并干台照容京歐陽玄頓首再拜李畊照磨同致再三意玄又白

張潞公一帖

翦頓首上季京郎中相公契友閣下奉違晤言已閱數歲比聞使馭上三山尋又聞在武林而一皆平安之報

良用自慰區區備員翰讀近又承乏冑監昏懶日侵造
歸未允其貧而無子猶故吾也僕滿意李德之回豈意
有此凶憂為之痛心況手足至親其終天之恨當何如
也尚以人生有數少自寬解為禱李野令兄相公如會
萬萬叱名不及顓狀燕吳相望海航往來動以年期惟
珍護自強前即遠大不宣中秋日老蛻張翥頓首上記

楊廉夫一帖

八月四日老鐵禎帖上德常相公先生屢承問病乏力

不能接對今日體力稍勝忽老胥吳讓者泣拜床下自
陳八年淹滯相公憐之欲行叅補而有優游不斷者阻
之閣下不允告天無路惟有覓死地而已其情可哀今
假老夫一言欲相公補押一案為來官收錄之階公必
賜可此事不徒協衆論亦繫相公平日陰德事也扶病
為布此楮惟冀委察焉不具禎帖上悚恐謹後空

饒介之一帖

介啓昨許床楣楠木當得舊船上楠木為佳比所有者

亦是船上材但稍短耳須急得發來可應用蓋匠已至長短當依君家床也暇時可來嬉楠木當勿遲亮之亮之不具十一日介啓村叟老友

曩借沈維時所錄本今日偶檢閱遂淨寫一過丙午四月廿七日小樓

老客婦謠

老客婦老客婦行年七十又一九少年嫁夫甚分明夫死猶存舊簀帚南山阿妹北山姨勸我再嫁我力辭涉

江采蓮上山采薜米蓮米薜可以療飢夜來道過娼門
首娼門蕭然驚老醜老醜自有能養身萬兩黃金在纖
手上天織得雲錦章繡成願補妾衣裳玳瑁為妾佩古
意揚清光婢妾不是邯鄲娼臣會稽楊維禎上

老客婦傳

老客婦者會稽先生楊維禎先生以高科進士仕有元
三十年今行年幾八十而新天子以前朝老文學思一
見之將延入禮筵文館遣翰林詹同文奉幣詣門起之

先生以老客婦謝使者曰豈有八十歲老婦去木不遠
而再理嫁者耶明年又遣松江別駕追趣不已賦老客
婦詞一首徹齋聽曰皇帝竭吾之能以用之弗殫吾所
不能則可否則惟有蹈海死耳上允之已而賜安車詣
闕廷留百有二十日禮文畢史統定即以白衣馬骸骨上
成其志弗受爵賞仍給安車還山史館胄監之士祖帳
西門外行路之人望之如神仙異人吁客婦之謠伸矣
天驪太史贊曰李斯客婦於秦不能去而服五刑揚雄

客婦於莽不能去而卒投閣陷於死若會稽老客婦遇
明天子而卒完其志節其一時客婦之幸耶抑萬世名
教之幸耶翰林侍讀學士詹同文撰

飲廉夫拄頰樓時予奉命徵賢松江

飛樓高出市塵表萬丈文光照紫微洞仙曾與鐵為笛
天女或裁霞作衣酒酣尚欲招鶴舞詩狂未可騎鯨歸
休喚小瑤歌白雪自有紫簫吹落暉

詹同文

送楊維禎還吳淞

皓仙八十起高山喜動天顏咫尺間一代遼金歸宋史
百年禮樂上春官歸心只憶鱸魚膾野性懶隨鴛鴦班
不受君王五色詔白衣宣至白衣還

宋濂

藜科旅生庭中白露日割而為帚謂是日取藜無
蟻諺云

堂下生旅藜堂上秋風起藜生何重重秋風落其子子
落當復生根枯為往事朝乘白露降操割無螻蟻但知
傷藜根誰治藜生地我非厭為煩持帚懷厥自丁未八

月七日醉翁記

高深齋記

距吳城東一舍而遠介於吳淞笠澤之間有僧坊曰大覺其北則文殊院蓋皆建於梁天監年者勢沈沈深宏用以填蛟龍之宮龜鼉之窟其意遠矣大覺有名僧曰哲翁賢上人與文殊自南薰上人二師德望學業年齒性情皆霽然伯仲之間也予甫冠即託二上人為方外交蓋其學雖皆本於空宗至其遊戲藝苑從衡下上又

皆一出於經傳子史百家之言宜其學術見聞超卓不羣也已薰師示寂而賢師尚獨存年已七十餘謝院事退休平汀洲浦淑之上構屋若干楹言地僻則幽閒而爽塏言規制則朴儉而固實丹雘之輝麗藻井之繪刻一不得預於其間遂以孟浩然贈其家人貞曜先生之詩扁其室曰高深齋夫欲求古人之志匪徒以居而得名也予以才拙屏置人事每過茂草深林便欲終身栖遲而賢師無恙時邀予過其西隱即其東偏為予開燕

坐之室予亦喜人跡之罕至也每為師留連而不忘夙
習操觚弄翰焚香啜茗欣然忘歸賢師已矣繼公者有
曰從哲曰淨見而從哲師以其所乘扁舟即西隱東輦
而寘諸地覆以茅晝夜六時趺座舟中刻苦禪觀曾不
少休而淨見師尤青出於藍禪觀之餘工詩與畫詩格
清峭如涪翁畫法師董北苑要非其師資有卓絕於人
者固不能若此也世之人服儒冠衣誦儒經傳堂構菑獲
弗克承其先志者視此以為如何予既有愧於其師資

而又念其交契之厚故為之記以叙其情致如此云時至
正十八年歲在戊戌夏四月廿有五日默菴道人沈右記
和虞克用見寄

試拂龍泉劍虛涵三尺冰直心憂社稷孤憤泣山陵牧
野村村雨漁船夜夜燈感君多道氣懇款實難憑

與金伯祥虞克用清夜聯話

浩蕩即扁舟行徐適廣路玄雲蔽重陰澄湖潏洄沒客
雁度寒洲漁罾掛荒墅故人欣會面握手出深悰古篋

啓竒文微吟發清趣念茲慎勿忘勗哉紀良晤

克用先世乃冠纓相家文章事業銘彝鼎被絃歌克
用襲藏皆鯨珠也故云

陸廣

題畫

詩

層雲起西嶺餘華散芳洲卜居緬清勝願言成卧遊會
心談無為山水相綢繆書屋倚深谷佳木森且修良時
適真意罷飲臨清流吁嘆捷逕者奚識南山幽賦歸遂

初服拂袂登崇丘中吳陸廣畫并題詩

林積巫山雨山連艮嶽雲屢尋商谷士頻憶洞庭君學
篆時拈筆陶情日著文披圖撫陳迹往事孰同聞

天游生

用伯起韻呈溪月王真人

神仙方丈揭開玄一帶溪山凝紫煙四海佳賓同晚酌
滿懷清興愜春天高人自適談空塵客子欣逢下水船
後日相思何處所金鰲歷歷百寮前

李遵道

次韻就挽遵道

仙李如何竟小年松林滿壁慘風煙青山捫蝨誰同話
赤脚騎鯨自上天名世豈惟書畫學起家猶望孝廉船
無因得寄松花酒一灑清明筆冢前

王溪月

昔年玉麈共談玄豈意翻然凌遠烟應跨紫鯨歸碧海
或乘赤鯉上青天洛城空有盧仝屋采石元無李白船
墨竹世推賢父子不堪見畫憶生前

劉時中

不見使君今歲年豪端無處覓風煙謫仙入海窺秦月
騷客沈江問楚天竹石漫存蘇氏譜圖書盡屬米家船

人間底是招魂處只在滄江落照前

吳養浩

茆峰登覽賦思玄歸路冥冥向夕煙生不臨深元有道
死當涉險豈非天輞川風月留詩卷畫溪山待酒船

回首清遊成短夢不堪腸斷白鷗前

劉師魯

青竹騎將何處玄一陂燄水畫生煙難尋賣卜支機石
致使休官委羽天俗子偷傳摩詰畫仙書的寄賈人船

茅山接得詩筒了不道藍關馬不前

張伯雨

真人曾與洗重玄遙指蓬萊隔翠煙賈傅雅期雲外鵠

湘纍竟覓水中天江山不見王維筆湖海空懷米芾船
獨有孝廉能繼世時時哀些醑墳前

杜清碧

根蟠仙李世家玄猶挺清標入紫煙花落金魚曾把酒
柳搖銅雀舊朝天春風不及沅湘佩夜月空來采石船
惟有平生寄來竹幾回愁展向窓前

薛玄卿

長憶青蓮翰墨仙揮豪隨處寫風煙偶來泉石弄明月
忽跨紫鱗飛上天元氣淋漓蕭寺壁曄音淒斷越江船
誰將一掬懷人淚灑向西風墓樹前

王玄初

采石磯頭望謫仙
柳深鬱鬱暮生煙
百年盡屬大槐國
一日俄歸小有天
死別吞聲長入夢
舊遊無客更同船
醉中傳得王維竹
猶對山人卧榻前

倪元鎮

右見虞勝伯所錄舊抄內

晚節堂詩為竹洲仙母賦

許姥塘東余姥宅
高年七十見仙風
半生閉戶機杼老
二子讀書燈火同
大兒學仙類老子
小兒力仕如終童
瑤池春酒介眉壽
阿母蟠桃千歲紅

至正辛丑三月十有二日鐵篴道人在清真之竹洲
館試奎章賜墨書

辛敬詩一首

芙蓉華上露初晞
悵望佳人負遠期
何處放船歌白紵
誰家酤酒送青絲
春波楚客行雲夢
秋月仙郎小字詩
蒲葉正青蓮子綠
不愁無物寄相思

林泉讀書圖

調古世寡和材疎出無羣
種玉悶奇術還丹隱玄文
披

裹負薪士拾金世所聞雖無箕穎節亦不慕高勲石田
長芝草暮春自耕耘曲肱提耒耜長歌至日曛所樂良
在茲沒歲復何云 王蒙

題畫

虎鬪龍爭萬事休五湖明月一扁舟綠蓑衣上雪飈飈
雪月光中垂釣鉤釣得鱸魚春酒熟仙娃酒酣嬌睡足
彫胡炊飯斫鱸羹一縷青煙燃楚竹蓬窓眺對洞庭山
七十二峯青似玉 王蒙

巷南巷北稀相見奈此村頭泥濘何入手酒杯嗟有限
經心春事苦無多空簾花影聽鶯語明月簫聲嘆鶴馱
近報太湖新水濶幾時鼓枻共君過

阮孝思

房山墨竹

跋

房山高尚書墨竹世已罕得宜寶藏之至正十年七月初十日趙雍題

詩

智老能師杜拾遺雪舟不忝浣花溪過人為有才如錦
好客常判醉似泥早歲傳經曾玉殿暮年通籍必金閨
禪房夜詠袈裟薄十月燕山憶馬蹄

李宗表

至正己丑友人李宗表偕予往訪雪舟是日酌酒談
詩宗表且以詩題畫意甚適暮歸而宗表復得此詩
寄雪舟越五日師攜此畫示余乃房山高尚書真跡
因談及宗表詩請書其上十月廿有七日也

羅元

畫沙錐詩序贈陸穎貴

吳興陸有才學而隱於筆工其仲氏頴貴美髯善容止
尤有才氣可仕亂世而識幾不受聘則慨然曰以弓刀
竊祿孰愈吾世守筆錐之為貴也襲名頴貴而製之精
者標其號曰畫沙錐尖圓適健可與古韋昶爭絕臨晉
帖用筆喜勁故多用之稱吾心手吾書亦因之而進頴
貴亦自貴雖勢要求之而不可得則樸之以錦署曰非
會稽鐵史先生弗能知宣州諸葛氏云柳學士能書當
留其筆否則退還未幾果退還歎曰代無右軍何以用

吾筆而穎貴欲以吾當右軍愧甚愧甚惜余老矣所書
又不過山經野史汝錐之功無以用之以利天下徒為
毛錐累嗚呼錐乎錐乎其勿取晉與衛之所叱乎班虎
頭之所謫乎縱弗遇也其深悶毛先生之囊乎慎勿為
李錨兒掩貨以尋竇於王公貴人之門也穎貴肅然起
立抱襆退拜為錐誓曰代縱有祖范陽之神錐吾錐不
得易權矣龍集己酉秋八月初吉甲子鐵龍道人楊維
禎氏在雲間之柱頰樓試畫沙錐染奎章賜墨書

黃華字詩七首

掛鏡臺西掛玉龍
半山飛雪舞天風
寒雲直上三千丈
人道高歡避暑宮

手拄一條青竹杖
真成自掛百錢遊
夕陽欲下山更好
深林無人不可留

王母祠東古佛堂
人傳棟宇自隋唐
年深寺廢無僧住
滿谷西風落葉黃

年來白髮兩三莖
一別君時髭未生
惆悵料君應滿鬢

當初是我十年兄

賜酒盈杯誰共持
宮花滿把獨相思
相思只傍花邊立
盡日吟君贈別詩

酒盞酌成須滿滿
花枝看即落紛紛
莫言三十是年少
百歲三分已一分

相思夕上松臺悠
蟲似蟬聲滿耳秋
惆悵東齋風月好
主人今夜在幽州

此卷舊聞廬廷璧所藏
今李延吉見示為錄

之己酉五月初十日記

嘯堂集古錄序

景春沈君居樂圃坊與予同里閑且嘗同游可齋賀先生之門一日過景春所居出嘯堂集古錄見示嘗試觀之由秦以前三代之器若敦槃尊彝鼎鍾甬權之屬無所不有每列一器必模其款識而以楷書辨之刻畫甚精殆不類刊本讀之者文從字順如游商周之庭而寓目焉可謂奇矣坐客皆喈喈稱歎予謂景春平生寡嗜

慾唯酷好收書有別業在閭門西去城僅數里景春昔嘗居之人有挾書求售者至必勞來之飲食之酌之善賈於是奇書多歸沈氏集古錄其一也昔人有以千金市馬者得駿骨與五百金逾年而千里馬至者三今景春嗜書與昔之嗜馬者何以異哉吳中多好古博雅君子將以載酒殽問奇字者踵門而來景春不寂寞矣客曰然請書之元統改元十一月廿又六日吳郡于文傳題

補之竹卷

跋

此筆視渭川千畝瀟湘萬竿則不為多然孤竹清風亦
豈以多為貴哉補之寫梅極清作此君尤清進叔寶之
野涉翁題

詩

碧眼胡兒叫橫玉落月如盆照茅屋美人清夢斷梅花
却寫相思在修竹

至正甲辰七月望與張可觀觀於市涇別業因題以
識顧阿瑛

大癡畫

詩

茂林石磴小齋邊遙望雲山隔澹煙却憶舊游何處似
翠松齋下看流泉大癡

山木蒼蒼飛瀑流白雲深處卧青牛大癡胸次多丘壑
貌得松齋一片秋雲林散人

次倪雲林韻寄孫君實

腐儒筆耕豈謀生與世
落獨高情綠樽有酒誰共醉
素琴無絃聊自橫湘簾在鉤月當戶
羌笛惱人花滿城
幽居不知春事盡見客只言詩未成
全思誠

暮春書事用李學士韻

蘿陰承宇晚迷真柳絮縈風雪不晴
寓地見花傷故里
鄰家賒酒過清明絃拖錦瑟鄰塵闇
韋絕芸編蠹粉輕
遙憶行春多樂事
輜軒風暖動連城

清明不出因賦長句

著處看花即是日一春饒睡戀吾廬
客言沽酒休辭醉
兒勸今朝罷著書
自到中年心境蕩
舊開幽徑屐痕疎
鬢邊早已無霜縷
天上何由馳日車

吳炳彥暉

別部司馬印銘

至元三年

關將軍既以忠勇為漢死葬沮之陽
世廟食玉泉山中
在今之荊州當陽縣陳大建中智者大師建寺玉泉山
將軍陰有功焉世葆藏其所佩司馬關羽別部司馬二

印宋紹興間洞庭漁人復得其壽亭侯印并歸之寺與
舊印為三自我元建國凡天子即位寺僧必奉而朝世
祖武仁英文及今上皆親覽焉至元中當陽人朱德政
復獻別部司馬印方寸許蔚然如碧玉云得於沮陽墓
旁意謂亦將軍所佩寺僧求予銘然當時為別部司馬
宜不止一人一人佩重印亦不類而得於墓旁可異也
遂為之銘曰

方而正義之彰直而剛武之揚秘而藏千歲強乘聖時

發奇光非將軍曷沮陽葆玉泉配三章於萬億護我皇
揭僕斯

衛青玉印詩

陸友仁得白玉印文曰衛青王順伯定為漢物
將軍騎從公主時豈意刻玉為文章珠襦已隨黃土化
此物還同金雁翔軍中只識長平侯西風木葉茂陵秋
人生卑微何可忽碌碌姓名誰見收

虞集

公主家奴尚公主刻玉姓名奚足多為問任安門下客

大將軍印復如何

張雨

昔聞衛將軍起自衛子夫姊為皇后弟為奴親提漢兵
北擊胡旌旗劍戟罷熊羆指麾六郡良家子輸給三邊
幕府租血流金城斷斥堠魂駭老上燒穹廬天子召見
錫印符璽歌騎吹凱入都椎牛醢酒啓鞠室饗士論功
懸箭筈平陽故侯丈二及公主忸怩膝走趨兩兒佩綬
光耀軀外號內嬭絕代無荆玉寸方溫且腴古文繆篆
姓名俱螭尾壓紐巧盤拏植鼻磨墨急檄書史傳數紙

丘山如王侯螻蟻但須臾土花苔葉空糝糊何人手曾
秉鈞樞何人身已儕隸孥昔貧今富鼠作虎昔富今貧
鵠化鳬感時撫舊嘆以吁淮陰已死彭越趙良弓走狗
諺不誣衛青玉印千載餘珍重漢皇宏遠謨

吳萊

紫芝生詩八首

次韻韓伯清見寄之什凡五首

連雲溪水出具區連雲庄隻得自娛高齋松月足吟嘯
濁世詩酒忘榮枯我無丹砂鍊金液君有田土成膏腴

倘能種秫遠相致與爾日醉壺公壺

卜居海上僅三年春日繁華思遠天練水澄清宜釀酒
溪魚鮮美不須錢欲將野艇尋幽賞多謝雲山作勝緣
寄語風流老韓子定須楔日過莊前

間尋芝術保餘年信是神仙別一天避地有書能教子
窮居無術學飛錢桑麻繞舍田園計竹素堆床翰墨緣
慚愧長沙每招隱時臨車馬到階前

我居甘寂寞豺虎動成羣地僻傷春草江空憶暮雲友

朋難得會書札近相聞世事今如此愁來懶學文
久客黃岡地新年白髮仍嘆傷思執手憂患苦關心市
井皆譁語山林獨楚吟羨君漁浦上高隱貴腰金

次韻陸秀才春日幽坐

新塘雨餘流水新隔窻看花如美人晴絲冉冉墜復起
幽鳥嚶嚶啼更頻自憐華髮在海嶠誰肯野服隨山氓
故園荒穢久弗治且復飲酒從吾真

觀友人所藏古墨

雪堂手劑不可得色如黝漆闇然光安得一丸歸我室
臨池剩寫十三行

至正二十年十二月廿日紫芝生為又玄鍊師寫一
過

克舊與野高君作雞栖石圖後七年復觀於松江
之客樓嘆歲月之易度慨人事之不齊為之撫圖
悽惻野高君謂予耿耿者在豪邁之氣非復曩時
酒酣出紙徵畫為寫質當圖筆意縱逸不計工拙

然自謂差強於曩作要知水到渠成顛瀾駭浪自
有靜時野高當示雲林高士同一賞識也

幽澗話別汗沾衣颯爾西風候雁飛我但悠悠安所分
誰能屑屑審其微釣竿不插山頭路獵網寧羅水際磯
獨有休心林下者騰騰兀兀靜中機

東吳宋克

題畫

青雲山中大玄道人隱者也時扁舟來往菑武之上與
游從則樵夫野老而已余拙守衡茆橡林有年矣夏末

會於幽澗泉山主常師方啜茗碗忽若氣逼懷黃帽催
行甚急別後流光迅速惜哉因就其韻戲成四首書於
畫松之上且發一笑

梅花道人

詩送吾宗張則明先生之山陽

淮南歲晚見宗人況是斯文骨肉親且喜出行無雨雪
莫言離亂有風塵一官未必鄭虔老駟馬何如原憲貧
休道廣文氎獨冷山陽教席暖如春

金臺張元固

甯節婦者故元帥甯武宣公之介婦也姓獨吉氏

初至元中武宣自河內以兵從平江南遂留鎮姑
蘓因家焉延祐中其季子為樞密斷事官卒獨吉
氏奉柩歸葬河內廬墓三年乃還吳有司上其事
旌其門而復其家

太行西望別京都長憶初孀柩在途君子首丘今或有
婦人廬墓古應無三年喪畢還歸鎮兩地魂消獨撫孤
閭里有旌門有戟何堪把節老東吳

揭傒斯

花菴編絕妙詞選十首

劉過字改之太和人稼軒之客王簡卿侍郎嘗贈詩
云觀他論到前賢處據我看來近世無其詞多壯語
蓋學稼軒者也號龍洲道人

賀新郎

懷舊

老去相如倦問文君說似而今怎生消遣衣袂京塵曾
點處空有香紅尚軟料彼此魂消腸斷一枕新涼眠客
舍聽梧桐疎雨秋風顫燈暈冷記初見樓低不放珠
簾捲晚粧殘翠鈿狼藉淚痕凝臉人道愁來須殢酒無奈

愁深酒淺但寄興蕉琴紉扇莫鼓琵琶江上曲怕荻花
楓葉俱悽怨雲萬疊寸心遠

賀新郎

睡覺啼鶯曉醉西湖兩峯日日買花簪帽去盡酒徒無
人問惟有玉山自倒任拍手兒童多笑一騎乘風翩然
去避魚龍不見波聲悄歌韻遠喚蘇小神仙路近蓬
萊島紫雲深參差禁樹有煙花繞人世紅塵西障日百
計不如歸好付樂事與他年少費盡柳金梨雪句問沉

香亭畔如何召心未愜鬢先老

賀新郎

贈張孝功

曉印霜花少夢半醒扶上雕鞍馬嘶人去嵐濕青絲雙
轡冷緩鞚野梅江路聽畫角吹殘更鼓悲壯寒聲撩客
恨甚貉裘重擁愁無數霜月白照離緒青樓回首家
何處早山遙水濶天低斷腸烟樹誰企天涯牢落況輕
負暖雲濃雨記酒醒香消時語客裏歸鞚須早發怕天
寒風急相思苦應為我翠眉聚

賀新郎

多病劉郎瘦最傷心天寒歲晚客他鄉久大舸翩翩何
許至元是高陽舊友便一笑相歡攜手為問武昌城下
月定何如揚子江頭柳追往事兩眉鬪 燭花細剪明
於晝歎青娥小紅樓上殷勤勸酒昵昵琵琶恩怨語春
筍輕攏翠袖看舞徹金釵微溜若是相逢吾未老道長
安市上狂如舊重會面幾時又

念奴嬌 自述

知音少算乾坤許大着身何處直待功成方肯退何日
可尋歸路多景樓前垂虹橋下一枕眠秋雨虛名相誤
十年枉費辛苦不是奏賦明光獻書北闕無驚人之
語我自匆忙天未許贏得衣裾塵土白壁堆前黃金繞
後付與君為主尊鱸江上皓然明月歸去

唐多令

再過武昌

蘆葉滿汀洲寒沙帶淺流二十年重度南樓柳下繫船
猶未穩能幾日又中秋 黃鶴斷磯頭故人曾到不舊

江山都是新愁欲買桂花重載酒終不似少年遊

水調歌頭

春半

春事能幾許密葉著青梅日高花困海棠風暖想都開
不惜春衣典盡只怕春光歸去片片點蒼苔能得幾時
好追賞莫徘徊雨飄紅風搖翠苦相催人生行樂且
須痛飲莫辭杯坐則高談風月醉則恣眠芳草醒後亦
佳哉湖上新亭好何事不曾來

水調歌頭

自述

弓劍出榆塞鉛槧上蓬山得之渾不費力失亦匹如閒
未必古人皆是未必今人皆錯世事沐猴冠老子不分
別內外與中間酒須飲詩可作指休彈人生行樂日
自催得鬢毛斑達則牙鼓金甲窮則蹇驢破帽莫作兩
般看世事只如此自有識鳴鑾

天仙子

初赴省別妾

別酒醺醺渾易醉回過頭來三十里馬蹄不住去如飛
牽一總坐一總斷送殺人山共水是則青衫終可喜

不道恩情拚得未
雪迷村店酒旗斜去則是住則是煩
惱自家煩惱你

沁園春

風雪中欲詣稼軒久寓湖上未能一往
賦此詞以自解

斗酒彘肩風雨渡江豈不快哉被香山居士與林和靖
約坡仙老勸駕子回坡謂西湖正如西子濃抹澹粧照
鏡臺二公者皆掉頭不顧只恁傳杯白雲天竺去來
看金壁崔嵬樓觀開況一澗縈紆東西水繞兩山南北
高下雲堆逋曰不然暗香浮動何似孤山先放梅須晴

去訪稼軒未晚且此徘徊

辛稼軒沁園春

止酒

杯汝來前老子今朝點檢形骸甚長年抱病咽如焦釜
於今善眩氣似奔雷汝說劉伶古今達者醉後何妨死
便埋渾如此歎汝於知己真少恩哉更憑歌舞為媒
算合作平居鴟毒猜況愁無大小生於所愛物無美惡
過則為災與汝成言勿留急退吾力猶能肆汝杯杯再
拜道麾之即去招則須來

朱希真西江月二闋

世事短如春夢人情薄似秋雲不須計較苦勞心萬事
元來有命幸遇三杯酒美況逢一朵花新片時歡笑
且相親明日陰晴未定

日日深杯酒滿朝朝小圃花開自歌自飲自開懷且喜
無拘無礙青史幾番春夢紅塵多少奇才不須計較
與安排領取而今見在

釋孤雲詩序

某與友人方元質甫往來紮淦玉峽之間每一會合輒
取古今作者之詩更續歌詠每繹其言意元質間誦孤
雲詩一二似若流離放逐不得志之為者又若神情閒
放無羈於世範者也惜不識其為人且不見其全藁比
者其安成令宜春周昌吾致書山中曰釋孤雲之詩若
千卷務敏王君將與好雅之士共梓傳之請為序引予
既受而讀之則其念母憶弟別友憂時之作極為哀愴
不能不使人興起其秋思之情蓋亦聰明特達而遭時

喪亂不得與於禮樂刑政乃寄所安於浮屠氏故其聲
變亦止於其身世之所遇者如此若乃逢時昌盛與縉
紳君子上下其論而和平其聲亦可夷猶松菊而傲兀
古今矣若廬山道士黃可玉永嘉僧德儒之詩予甚愛
其酌情達意篤於倫理今錢唐道士陳渭叟之紫雲編
廬陵僧法高之疎雨集誠可並傳讀者將因其聲以考
其世之所尚因其言以觀其人之所遇則於世故人情
之變亦無不盡矣蓋詩之在宇宙若元氣之周流凡有

生之類莫不充滿大之為日月星辰山嶽河海小之為
草木花實鳥獸蟲魚無不各得其所受而為詩者獨能
攬結萬類之精微以深寓夫理趣之所至而增夫倫誼
之則可興可觀可羣可怨而詩之為道其庶幾矣夫孤
雲諱法真姓郭氏谷陵安成人也至順四年中秋日京
兆杜本伯原序

先君太史棄諸孤之四年集來吳門省達州府君
大墓始見叔父南山翁翁與集同出太師雍國公

蓋四從矣翁曰後會未可期幸留數語識歲月翁
方教授外鄉又以推人生年月日時論禍福以助
道故不能久留城中敢賦此以承命云爾

玉屏古栢與天齊憶過於今又七期
各道遺書向江上
西風江水鬢絲絲

玉遮墓下有諸孫東望滄波每斷魂
泣血三年餘喘在
更將衰淚灑荒園

族人散處江南郡不識音容但記名
世澤須令孫子憶

故家今幾尚簪纓

虞集

客桐江風雪中有懷堯書記在吳中

吳水三千里相思歲欲殘一盂供客飯去日是春寒
慷慨逢人少高深用世難政當風雪夜還憶過江干

釋法高

謫仙歌

清夜獨坐天地無聲星斗動搖欣觀李白集高吟數
篇皆古今不經人道語騷章逸句灑然無留思寥寥
數百年間揚鞭獨步吾所起敬起慕者太白一人而

已感歎久之恨無人能繼太白後因成謫仙歌以是
祝太白舉觴以酬太白太白有靈其聽我聲知我意
矣

李白字太白清風肺腑明月魄揚鞭獨步只一人我誦
太白手屢拍嘗聞太白長庚星夜半星在天上明仰天
高聲叫李白星邊不見白應聲又疑白星是酒星銀河
釀酒天上傾奈無兩翅飛見白王母池邊任解酲欲遊
金陵自采石翫月乘舟歸赤壁欲上箕山首陽巔看白

食雪水底眠紫烟又不知在何處漱瑤泉酌霞杯悵望
不見騎鶴來白也如今安在哉我生恨不與同時死猶
喜得見其詩豈特文章惟足法凜凜氣節安可移金鑾
殿上一篇頌沉香亭裏行樂詞此特太白細事耳他人
所知吾亦知脫靴奴使高力士辭官妾視楊貴妃此真
太白大節處他人不知吾亦知歌其詩鬼神泣解使青
塚枯骨立呼其名鬼神驚惟有羣仙側耳聽我今去取
崑山玉將白儀形好雕琢四方上下常相隨江東渭北

休興思會須乞我乾坤造化兒使我筆下光燄萬丈長

虹飛陳亮同甫

右見龍川集第十七卷

胡布詩

車轆轤

車轆轤循軌躅耳馳紕駕逐掩弧矢望潼谷車噉噉
出東門歷培塿不憚煩豈不懷國士思登高山窮躋攀
度隴水向秦關男兒死即以尸裹馬革何用戚戚為妻

子凋朱顏旦行青山雲暮繞紫塞烟飲馬月窟水四顧
何茫然慷慨登途遠良日上屯還佩劍隨元戎分兵王
帳中挑燈夜決策達旦掠羣兇太白入月敵摧鋒刀橫
再戰一鼓雄魯連計就羞言功割牲啗勇士醉歌激天
風歸來謁天子封侯不足貴袖陳期以致康濟天子曰
卿柱石姿國之衛翼時之夷吾微臣再拜稱唐虞霸業古
所鄙念此民罄敵志曷期墮反側慶忌捷烏獲力終以剪
歸有濟先民恥雜霸後王棄同仁劉項不識字碩儒徒坑

焚周公不作素文述先遺民理化漸柔邇區寓載清淳臣
願天子師三王法姚姒民惟先德罔替九閔固羣生遂

雨憲分韻得青字

時積雨新霽景物爛然

上客佳時集衡門緹騎停鏗金披艷藻鳴玉振芳庭麟
鹵歸看核鷹頭飛淥醺花明雜樹錦山翠鳳凰翎覽景
惜時樂薦芳惟德馨酣歌迴落日緩帶倚春屏主奉以
百年客酬同千齡詎知壯士懷明時在丹青

賞靜軒

幽居安僻地泉石友芳襟倚景覽時秀虛局延賞音藉
君東郭履盼彼北山岑水華籠月沼竹屋韻風琴葉落
驚孤鶴花動起鳴禽論感潛夫僻捐之許由心觸此復
留憩俛世詎遺簪

送友人之京師

鳳凰出世不多見神駒汗血非全功子龍勇冠萬人敵
劉表氣壓三軍雄曾使策勳誇海內何必紀石歸遼東
迺子縱橫覽八極當駕巨浪乘長風

丈夫許國一何早中原紱冕皆吾徒絳火流雲赤雀下
神劍入海妖能屠嘉人玉琯不自惜宋客燕石何其愚
會見青冥奮鵬鶚鳶飛萬里騁良圖

臨青樓詩

高樓百尺瞰奔湍落日憑虛縹緲間石壁倚風青鳥下
鸞簫明月玉龍還霸圖猶在英雄夢雲氣或連吳越山
何限興亡眼前事五湖烟水不相關

龔宜詩十一首

贈劉萬戶

故宋魏鶴山先生祠宇久為軍士所據萬戶劉侯為
之屏之故賦此詩

於赫魏公百世之師昔我先皇寵建厥初維祠伊何公
之所止俾我後人有敬毋弛爰有武士如羆如熊肆其
昏囂紛集於中或號或呶或易寒暑鳴鴉在林公食無
所桓桓劉侯眎此曰嘻其如頑獷曷宜有之立飭其旅
汝挈子女汝還汝營汝無齟齬其旅既屏公居既寧伊

誰之功實侯之明侯功張矣侯且昌矣匪私其言邦人之語嗟予小子式歌頌章敢告國史俾也可忘

賦畊雲窩

素寡名利心躬畊向南畝晴雲覆行窩棲遲甘白首芸香散遺編松華熟新酒日夕誰與娛相過有隣叟嘆彼操瑟人王門立何久

正月九日試筆

聖歷迴昌運春陽喜載和落梅風外急輕雪晚來多闕

下恩頻降河南使復過野人當此日一酌意如何

送趙海寧

解纜沙邊驛分符海上城西風駐五馬落日擁雙旌
世已厭鞞鼓人皆望治平使君推善政庶以慰疲氓

荷雨軒為明上人賦

青荷覆前沼白雨來亭軒隨風貯圓葉欲滿儵已翻
物理有如此一笑復何言

題遊子東歸圖

遊子久不歸
慈親髮如雪
江湖多風波
胡為苦跋涉
歸來乎
山中
山中有薇蕨

次柳仲修韻無似水西新仲銘外史

滄江為客驚三載
故國飛雲渺一鄉
結社久欣從惠遠
論詩還喜識曹唐
馬嘶沙塞旌旗赤
鴈度關河草木黃
漢室重興應有日
卧龍聞說起南陽

送帖尚書督餉還朝

聖明天子中興日
南土諸侯職貢年
萬里傾恩勤玉節

千艘轉粟上青天
屨趨丹陛膺前席
酒酌金壺出內筵
奏對若承幽側問
為言丘壑有遺賢

送華徵君還鄉

故鄉亂後誰歸得
獨愛東湖隱者還
豈為丘園邀束帛
只緣猿鶴戀空山
華邊濁酒須頻醉
竹裏衡門不用關
我亦四方倦遊客
思家因汝動愁顏

秋夜言懷次韻

倦客無眠步廣除
月高天宇夜何如
醉題梧葉風歌帽

笑拂芙蓉露濕裾歷國底須三寸古傳家賴有五車書
眼明得見承平日白首衡茆不願居

題畫葡萄

月黑爛星斗下有虬龍蟠起眎夜無寐庭虛秋露寒

龔宜

王錫詩三首

詠竹西上人載雪軒

竹西屋上長堆雪疑有天花雨法幢乘興偶忘居陸地
浮家仍似在寒江蒲團夜白生虛室柳絮春陰覆短窗

炎暑不為融濕去定知滕六被陽降

中秋翫月

露白秋中河漢平纖雲無翳一輪行素娥不妬傾城色
玉兔曾含利物情人事隔垣俱洞見天心四海定同明
憑誰為借仙宮便願接盧敖上太清

淮南偶書

郡邑蕭蕭百戰餘瘡痍未復尚征輸交情頗似周公瑾
才學寧無董仲舒漢末英雄金刻璽淮西音捷羽傳書

清江擊楫增高興故國無勞自索居

全思誠九首

題翟志道大尹題惠山泉韻

梁溪之源日泠泠此山得爾方知名
九龍蜿蜒鱗甲潤萬家昭晰心神清
石闌曉含河漢影竹壚夜沸風雨聲
桑苧祠空霜月白老僧留客說無生

次韻題江陰驛樓

光陽樓頭山日斜漁子棹舟緣白沙
大江昔年渡五馬

古木至今號暮鴉
晴雲散空爛作錦
秋葉墜地紛如花
我來臨眺獨愁絕
破屋炊烟能幾家

次韻過張隱居宅

隱君卜居山礪旁
數椽茆屋蒼苔荒
天霜夜深木葉赤
客子曉踏槐花黃
魚傳尺書過錦里
雞隨斗酒來鄰邦
劇談終日不忍別
坐見嶺月揚清光

次倪雲林韻寄孫元實先生

腐儒筆耕豈謀生
與世濩落非高情
綠草有酒惟共醉

金史四十五卷之三
卷八
素琴無絃聊自橫湘簾在鈎月當戶羌笛惱人花滿城
幽居不知春事盡見客祗言詩未成

題錢素菴藏六窩

道人善適息綿綿中夜存五官謝形役召入侍心君嬰
嬰尚胚胎渾沌初未分六子有妙用深藏天地根空虛
與生白玄牝為之門支床三十載凶吉兩忘言寄語窩
中人得失奚足論

錢愛山席上與宇文子貞諸公分韻得綠字

芳塘淡微波嘉樹藹新綠王孫敬愛客書永杯屢覆乾
坤一傳舍日月互推轂不知壺天外塵海昧人目

懷遠道

去去渺遠道依依懷舊丘開軒宿雨霽臨流溽暑收輕
颺振庭柯落日明沙鷗太息歲云暮候蟲吟素秋

題趙魏公秋林曉行畫卷

王孫愛畫心獨苦下筆天機妙今古涼風蕭蕭涼月落
寒烟載我出林莽黃葉打頭秋滿身青山對面如古人

不須覓句灞橋雪何用旅食京華春憶昔玉堂供奉日
一二詞臣同住直青綾被冷露華濃金蓮燭殘河漢側
雞栖樹底聲喔喔鶴立螭坳望珠箔鳬鳥散亂不成雙
歸老林泉有餘樂臨風掩卷老淚落此畫此人那可作

送王元章如越

我從越中歸山水猶在眼賀湖天寒氷鑑清禹穴水落
雲氣暖夢中往往復登臨萬壑千巘姿蕭散故人山水
窟中來題詩直上姑蘇臺酒酣目力隘宇宙少年筆陣

排風雷謝公屐下小吳越如望中原更奇絕終南大華
青不了桑乾之陰多積雪送君出門歌遠遊自歎把鋤
空飯牛觀光歸來尚黑頭訪子却覓山陰舟

全思誠字希言

阿瑛存藁二首

草堂五月少人過門巷泥深奈雨何滿樹枇杷罵竊盡
一階芳草蟻行多因思葛吟梁父却笑蘇秦讀揣摩
老我衰年無白髮從今也會號瞞瞞

憶昨相過寂寞濱白頭傾蓋豈如新驚回赤壁三更夢

開盡桃花一度春
顧我老為思
櫪馬憐君遠
作倚樓人
喜君壚畔三珠樹
留待來時醉掛巾

堯文文學上謁握手道舊情
藹如也臨別蒙贈以
詩且厘簡及謹依韻奉呈用博一粲

玉山久望子來過
一見論文喜若何
竹葉留人忘夜永
桃花得主自春多
親安甘旨同銘樂
民苦瘡痍待揣摩
盡說虎頭當食肉
老子鬚髮已先皤

憶得婁門婁水濱
君家來往綵舟新
會溪避地逢今日

繞屋栽花及早春多謝手題相問字獨憐身是未歸人
幾時一醉酬翁德也就陶公借葛巾

白屋山薛毅夫

郭亨詩七首

近詩寫呈平湖草堂主人大章先生就希繫可友生

郭亨再拜

八月十五夜與仲義邾君對月

海宇塵空洗玉盤清輝共挹此江干一天風露秋無際
萬國山河夜未闌歎指玄霜分白兔醉看明鏡舞青鸞

桂花謹訂嫦娥約還許披香到廣寒

十六夜與仲義對月

十二瓊樓夜不扃素娥飛舞見分明
鮫人獻璧龍湫白蟾腹懷珠海市晴
粲粲南山歌不夜輝輝北斗轉孤城
清光偏照征夫恨不道閒居有太平

次筠谷中秋客松城韻

澄澄軒檻夜逾清坐看梧桐壁月生
人似錦袍思太白詩如石鼎得彌明
今宵景物清塵夢終古江山不老情

却憶廣寒天咫尺鳳翎光采怯瑤京

次仲義同遊西清道院

勝日尋詩來道院解衣盤礴憩秋清蒼松白鶴庭階見
綠水金鱗池畔行四面軒窗皆客坐一時懷抱為君傾
從容且覓幽貞趣敢望勲垂竹帛名

次吳近仁秋日見寄

離懷日夜滿丘園清論無由洗耳根水落吳江鱸可鱠
秋高禹穴栢休捫兵戈此日同為客鴻雁西風獨掩門

吟罷新詩苦相憶白雲紅樹隔孤邨

送倪得中赴春闈

一經已亞龍頭選萬里早充觀國賓御酒葡萄瓊宴晚
宮袍楊柳玉階春瀛洲禮樂同中夏天府圖書拱北辰
此日看花酬素志好來歸賀曲江濱

次丘克莊寄平湖草堂韻

苦憶維揚丘進士移家江上已多時丹墀射策催登第
絳帳傳經更說詩兔窟天香吹桂籍鶴巢秋色近松枝

相思只隔胥溪水肯負黃花節後期

水竹居

吳下人多水竹居俞公染翰笑談餘詩文固已瀾翻甚
嘯詠還當雨霽初篇什漫勞陳組繡園池無復有禽魚
只今蕭散南湖上種玉疏畦孰侮予

勉之兄吳城宅中有水竹居聞甚清邃兵後其地以
處軍卒因遷居松陵南湖之上亦種竹疏渠婆娑其
間比之城中尤清曠也俞尹作記瀾翻浩浸雖白首

暮年猶不除少年舉子習氣耳題燕適之所曰水竹
居吳人多用之類皆鑿池種竹以為深靜爽朗予至
吳中士大夫家每見如此故篇中悉及之至正二十
二年壬寅九月廿六日倪瓚書

題馬遠柳塘聚禽圖

寒鴉數點江南邨鳴飛宿食雁有羣灘頭飛下兩灘鶉
雪色半消潑墨痕修竹天寒低翠袖搖曳絲絛沙上柳
陡然斜出數枝紅隔水敲拂淡相守

畫來盤礴殊有情頓置色境如生成歲寒動植各有態
相示以意初無聲黯淡溪光不知處撫景吟成有聲句
醉來拂拭畫圖看中間著我騎驢去

俞焯私印越來子
字午翁

夏夜乘涼懷舍弟公素正字

山暝夜初靜明月來青天
苑齋苦炎熱涼生溪樹邊
移榻就松陰陰陰濃清露
滴開襟扇罷揮散髮詠苔
石靜聞玉漏傳聞看銀河
濕於馬愜心賞每憶京華
客未審今夜裏還念家山
不

金聲

送許州太守陳璉之任

華星燭廣川驚飈散高樹故人暫離羣跨馬之官去遙
峰淡晴暉孤鶩隱深樹流水日夜馳眷眷那能住隔浦
聞疎鐘明朝在何處

曾日章見潁州志

擢閩海都元帥承恩宴歸

奕奕黃封下九天繡衣持節舞蹁跹旌旗影裏庭槐干
鼓角聲中海月圓綵綰金符持尺籍歌停翠袖捧觥船
醉歸只覺皇恩重一任宮花壓帽偏


王郁中

閨門舟中戲作呈伯原志東二心契

吳王故苑古長洲
潮汐池邊一佇留
秀蕙芳蘭無處所
亂葦叢葦滿清流
高歌一曲閨宮徵
人生只合行樂耳
蘋風忽起吹舟悍
雨打圖書藏裏亂
閨門咫尺不安流
何況河津與江漢
非無輕楫妙迴旋
逆風逆水適相纏
須臾風回水流順
星漢浮槎現嬋娟

米南宮

吳閨老見南宮真跡所錄壬戌六月二日大雨午窓書



珊瑚木難卷八